

萬 有 文 庫

第 二 集 七 百 種

王 雲 五 主 編

曝 書 亭 集

(二)

朱 彝 尊 撰

商 務 印 書 館 發 行

曝書亭集

(二)

朱彝尊撰

國學基本叢書

曝書亭集卷第一

秀水 朱彝尊 錫鬯

賦

謁孔林賦

粵以屠維作噩之年。我來自東。至於仙源。斯時也。壇杏花繁。庭檜甲坼。元和之犧象畢陳。闕里之榛蕪盡
闕。既釋菜於廟堂。旋探書於屋壁。乃有百石卒史。導我周行。牽車魯城之北。縹馬洙水之陽。卽大庭之遺
庫。循端木之故場。驕孫耐兮居前。聖子藏兮在左。自黃玉之封緘。闕幽宮而密鎖。隕長鯨兮不驚。懾祖龍
兮遠禍。除荆棘之叢生。罕翔禽之飛墮。雨露既濡。遲景東隅。整衣裳之肅肅。正顏色之愉愉。展謁方終。誕
尋往蹟。超百兔之深溝。撫青羊之臥石。爰有草也。苞著其名。守之以龜。一本百莖。我求其德。洵圓且靈。爰
有木也。題之以楷。非柏非樅。靡癭靡廩。歷千禩而長新。貫四時而不改。惟先師之遺澤。道莫著乎六經。配
光華于日月。若迭奏之琴箏。降而後儒。各事采獲。中文古文之書。先天後天之易。目鄭衛以淫邪。誣春秋
以深刻。藐往哲之嘉謨。恆末師之是則。滔滔天下。後死其悲。安得起素王於泉壤。操筆削而正之。我思古
人。恥同汚俗。或六聘而收身。或三詔而逃祿。或依李充之山。或就張超之谷。潛戶壁于服虔。變姓名于梅

賦

一

福入源水兮栽桃。隱丹霞兮種竹。詎如此地。桑海不遷。可游可息。有歌有絃。耳不聞僧尼之魚板。目不覩旗鼓之樓船。樂土樂土。速營一廛。願爲林戶。躬耕墓田。庶幾近聖人之居。讀聖人之書。將不得爲聖人之徒也與。

春蒐賦

皇帝御宇十有八年。握金鏡。運玉璇。超百王之聖域。漱六藝之神淵。德無遠而勿屆。聲有濯而彌宣。舞兩階之干羽。靖萬里之戈鋌。雨洗炎洲之瘴。波澄閩海之煙。聿將秩祀。衡岳底定。巴滇猶克。嚴夫武事。洵無逸而有虔。乃命僕臣。乃召司馬。選烝徒以大蒐。諏吉日於小雅。晉鼓則百二咸陳。虞旌則東西來下。車鏤象以煇爛。駟飛黃而白赭。風清紫陌之塵。天闊黃圖之野。於是乎駕六駟。從百官。建九旂。總三單。經長楊。陟上蘭。遵路直。從橋安。歷平原之膺膺。瞻秀木之丸丸。雲霏霏兮五色。山磊磊兮層巒。斯時也。穀雨新晴。暮春之序。劍乍捧乎金人。觴甫浮於鶴羽。亞繁杏兮山郵。舒崇桃於野圃。藥苗則的的依闌。菖葉則青青被渚。粉颺鳳子之衣。綠潤桐孫之乳。雉角角兮晨飛。鳥啞啞兮晚翥。兔趨趨兮淺草之叢。鹿呦呦兮平林之塢。爾乃刷霧鬣。騰風鬣。擊鷲鳥。搏毅蟲。落驚雌。駭高雄。輕裘兮不御。暄景兮方融。釋其一面之網。射以九和之弓。三驅兮四牡。一發兮五縱。於焉斂綏章。徹表貊。張幔城。羅藻帟。息蔭乎高林。容與乎秀澤。數獸計鮮。犒勤讚獲。大庖不盈。乾心有懌。用訓儉而昭仁。豈丘崇而山積。調六膳而作甘。飲三漿其如液。則有

飛龍之舸。鳴鶴之舟。梁排雁齒。水漲鴨頭。和迴波之妙曲。詠在藻於中流。沙停振鷺。權起眠鷗。白魚湧躍。黃鵠翔留。勝昆明之習戰。與華林之沂遊。於是川后效珍。河宗輸寶。山出醴泉。地生朱草。鐫十鼓於岐陽。列三山於蓬島。天子師湯文之裕民。法軒轅之訪道。省四野之耕農。問百年之耆老。照華薄以春曦。浹恩膏於靈沼。爭擊壤兮康衢。永銷兵兮海表。在昔成王繼序。四征弗庭。既巡侯甸。萬國咸寧。暨漢文帝。邊宇肅清。猶選良家於六郡。躬戎服而治兵。稽春蒐之盛禮。允治世之大經。豈其賓客是燕。乾豆是營。惟居安而必慮。斯坐致夫太平。敢擬廣成之頌。用垂休美之聲。

太極圖賦

原夫黃牙欲發。蒼精未垠。一氣融結。萬象胚渾。馮馮翼翼。烟烟熅熅。睢睢盱盱。縣縣分分。既龐鴻之莫兆。何聲臭之可聞。量則包夫清濁。質斯合乎昭昏。謂虛無而有象。運妙有而無鄰。鴻靈幽紛。泰貞蠢闢。混成天地之先。互藏陰陽之宅。觀動靜兮無端。占迴游兮不隔。譬水車之恆轉。類果核之未坼。爾其理則貫一。象實函三。白麟之書莫吐。赤雀之籙未銜。名雖傳乎十翼。義尙晦乎周聃。啓華山之妙蘊。藉營道之幽探。种穆祕師授之說。朱陸滋異同之談。至希至微。無偏無側。一翕一施。半白半黑。外若離玦。中如含薏。萬物於焉化生。五行之所糾纏。成能設位。圖往鏡來。化一氣甄三才。天根啓。月窟開。悟儒言於冥蹟。允經學之倫魁。乃知聖人能備全體。先知可詔後覺。大道爲事物之母。天子有簡能之學。用廣運而不窮。信範圍之

非邈。願永繪於丹辰。方金鑑之在握。

夜明木賦同澤州陳侍郎作

皇帝避暑於興州。時維昭陽大淵獻之秋。尋捺鉢之舊蹟。啓帳殿於仙陬。六屯內肅。千廬外周。雲容容兮四合。水泱泱兮交流。風颯颯兮徐來。雨霏霏兮乍收。爰有物焉。星芒遙逗。明滅露螢之尾。吐吞火雞之味。謂野燒而不延。疑神燈而未輟。迺命俞騎。卽而視之。是爲廩木。有枿無枝。黝同桴炭。澀若榴皮。如場之轉碌礪。如絳之拽豐碑。載以堅車。駕之健犢。入重關。度平谷。選郢匠以運斤。俾奄人以司局。舍科上槁。存堅多心。近天顏兮咫尺。位祕宇之崇深。鑽不勞兮司燿。燎無灼兮烘熤。等壁夜光。類珠宵映。方角枕而輝盈。比風簾而神定。四照儼若木之華。六宮擬賓連之慶。豈非聖德之咸臨。固無遠而弗鏡。宜坤珍之畢效。雖枯木朽株。亦疇德而瑞聖。

省方賦

歲在甲子。歷應上元。聖化翔洽。東汜西崑。九州之外郡縣。重譯而至橋門。嘉穀駢穗。濁河激源。於時山祇望幸。臣庶上言。請欽崇以郊俗。或奉符而封巒。天子思省方以設教。用求莫而監觀。踐六十四民之遙迹。省七十二后之彌文。吉日旣諏。德音斯布。蠲六軍所過之租。減四方惟正之賦。推湛恩於槐宸。霈解澤於棘路。神人交贊。遐邇樂附。願儲祉以慶成。共希光而景鶩。迺以九月辛卯。農事備收。七騶始駕。百工方休。

扈千官於行所。勒五營於道陬。旣伯旣禱。爰豫爰遊。承曲璫之璇蓋。建太常之辰旒。導以金鉦瓊級。騁以紫燕玉蚪。鳴葭而雲韶並和。駐罕而星廬外周。黃圖三輔。青壤千里。濟鬲津以無波。履平原其如砥。則有單椒秀澤之山。側坎飛輪之水。橋號鵲華。湖名蓮子。踰歷下之舊城。尋介丘之遺趾。美哉左海山。有岱宗。閭啓仙人之石。官存大夫之松。天雞鳴而躍日。宸駕至而呼嵩。徹稽席蒲車之制。罷泥金檢玉之封。於焉訪淮土之仙茅。驗吳門之白馬。渡河則神獻其寶。遵海而風不鳴瓦。泛藻舟於中流。息參旗於大野。越南竟與南徐。溯吳下而白下。帝有恩言。宣示函夏。眺勝國之蒿萊。封蔣陵之松檟。德無施而不徧。恩未沾者蓋寡。由是展軫素王之里。致齋金絲之堂。陳元和之犧象。循闕里之宮牆。懸車在廟。遺硯在牀。肅拜杏壇之上。翔步檜庭之旁。洵禮隆乎三古。而事冠乎百王。衡律旣同。秩祀有典。振旅則邇。考祥斯遠。覽四瀆而經五州。乍六旬而還輦。兩宮交悅。萬姓齊忭。粵若稽古。時致太平。必命掌故。登封告成。或紀社首。繹繹或禮云云。亭亭石城石距之狀。金匱玉匱之形。祺安禪安之樂。封壇覲壇之銘。莫不雲連帳殿。雷動山庭。未有諮詢疾苦。彰瘡濁清。不警不蹕。不震不驚。凡高年之耆老。尺口之童嬰。婦子所集。商旅所經。咸得覲天顏於咫尺。瞻仙仗於郊坰。至若天縱之能。溢於筆墨。月璧星珠。寶題靈式。鸞蹤鳳藻。被物成飾。轡唐帝之八分。陋宋宗之飛白。扁榜峩峩。發舒心畫。蔭之華棖。勒之貞石。誠與日月雲漢共昭。垂於無極者也。

湘湖賦

歲柔兆困敦兮。是月維陽。辭鑑水之一曲兮。言歸故鄉。遵大路于蕭山兮。猶勾踐之舊疆。舍予舟于城闕兮。別問渡于陂塘。踐荒塗之幽辟兮。山是越而湖湘。園列岫之周遭兮。匯一水于中央。蓴絲苕帶。齊消歇兮。澄百頃之波光。相茲湖之寥闊兮。湖蒼蒼之葭葦。漾輕舸而如所如兮。逾五里而十里。鮮澤農之耕作兮。但眾師之棲止。雉角角以飛鳴兮。鷺娟娟而停峙。瞻牛頭與苧蘿兮。信不遠而伊邇。愛山川之清淑兮。丁斯生長。夫西子。洵明豔之絕倫兮。直夫差之一死。以餘暨爲諸暨兮。驗往牒之非是。眺越王之故嶂兮。丁國步之連遭。會稽不可保兮。稱臣妾而播遷。洊臨江而祖道兮。奏哀曲于烏鳶。迨返國而渡三津兮。惟八臣四友謀猷之後先。既十年而生聚兮。更教訓之十年。簡俊士之四萬兮。率君子之六千。誕一舉而沼吳兮。齊衣錦而師旋。讎九世而當復兮。豈身恥辱而忘焉。志既立而轉死爲霸兮。胡後之人獨不然。他山難久留兮。問西陵而前路。夕既濟于錢唐兮。尙踟躕而迴顧。徒弔古而慨慷兮。惜年歲之遲暮。

水木明瑟園賦 并序

僕生平不耐作賦。雖以賦通籍。非稱意之作不存也。康熙甲申八月。陸上舍貽書相要。過上沙別業。遂汎舟木瀆。取道靈巖以往。抵其閭。則吳趨數子在焉。愛其水木明瑟。取以名園。上舍延賓治具。飲饌豐潔。主客醉飽。留七日乃還。念勝引之難再也。成賦一篇。先民有言。人各有能有不能。賦非僕之所能也。辭曰。度十畝之地。葺宅一區。泚有阡而可越。潭分沙而不淤。翦六枳而榭藩。因雙樹而闢閭。嘉水木之明瑟。愛

徑畛之盤紆。山有穴而成岫。土戴石而名岨。譽兩判而得路。萼四照兮盈株。園之主人。則陸生稹也。匪聲利是趨。惟古訓是茹。鼓枻而吟。帶經以鉏。不隱不仕。無礙無拘。良辰旣撰。爰遣莊奴。筆疏告吾。商飈乍肅。赫暑早祛。葵傾芳步。柰秀華芙。桂英粟綻。阜莢條羸。茗縛厥帚。鎌刈其蕪。井汲餅纒。牀轉轆轤。靡塵不滌。靡穢不除。可以譚讌。可以歌歛。夫子惠顧。跣屣無虞。於是竹垞一叟。誕發僧廬。遵彼橫塘。津逮岑隅。風塘傘竹。日漏衣櫺。亦有同調。數子素心。相於水抽。其帆陸柅。其車不速。而集語笑。軒渠離坐。貫坐或跏。或跣。生也。敕中廚。封兩筩。誠食饌之次第。傳方法于臆胸。乃羹乃淪。間以臚脍。藪則有蒲。鮮則有菹。擘翠房之鮮葍。剝紫芡之員珠。旋棊改令。覆斗傾孟。倒季路之十榼。慕宣尼之百觚。生起避席。顏色敷愉。稱園雖小。聊可以娛。夫子賦之。可歟否歟。叟曰。可哉。吾思魯鈍。母疾而徐。於焉閉關納屨。自晨及晡。拂几案。屏氍毹。挹勺水。注蟾蜍。默聳羸肩。潛捋短鬚。雖有千慮。終成一愚。譬諸奏事。四足而非馬。書券三紙。而無驢。爾乃舍左思之席溷。投鍾繇之筆拊。循蘭陵。踐椒塗。躡聽雨之樓梯。登升月之窗窳。流覽帷林。蕩漾方壺。心傾意寫。志豁神攄。留宿宿兮。信信。忽便便兮。諸諸。而曰。猗茲園之怡曠兮。經夫差之故都。駐我馬于高岡兮。想越來之師沼。吳傷西子之不作兮。徒憑弔于交衢。聆寶屨而聲銷兮。剩紅心之草鋪。嗟宮牆流水之入兮。驗妖夢之非誣。既上山而下山兮。復自田而之湖。回瞻巖椒之夕陽兮。挂霄漢之浮圖。逼茶隴之葱青兮。占稻田之豐腴。耘雖資乎疆以兮。穫免發彼租符。眺松皋之明秀兮。步衡薄而踟蹰。辭八門與七堰兮。

遠肥膩之姑蘇。望之叢叢蓊鬱。卽之羅羅清疎。旣外隈而內隩。亦前渚而後沮。磴希偪側。丘不崎嶇。澗無飲虎。穴少潛狙。石梁緩度。坦坦舒舒。春則桃殷李縞。夏則筍白櫻朱。薔一丈兮爛漫。香五木兮紛敷。架層闌之曲彖。刺不慮夫牽掣。又有同心宿蕙。並蒂新蕖。未八月而剝棗。先九日已囊萸。野芳斷兮復續。湛露晞兮更濡。訝鳩鵲之撲鹿。縱烏鳥之畢逋。啗啗楚雀。汎汎江鳧。雀則有鷖。鳧則有雛。翠羽定巢而不去。文鱗在藻而忽徂。非無牛宮豚柵。麀羖兔置。羝藩鹿砦。雉艾雞筴。螃蟹設籩。鱸鮓施罟。寧寬便了之僮約。而免責其辛劬。彼玉山之仲瑛。暨光福之良夫。連峰列岫。夾澗通瀟。豈若斯之一丘一壑。不見其隘。而祇見其有餘。且客獨不聞茲園經理之初邪。曩有高士。蜚遁山嶠。履穿東郭。面垢左徒。垂蘆簾于紙閣。然蕝葉于瓦墻。朋慵迎兮勿送。戶罷闔而不逾。柏雖生兮上槁。桐已醜而无膚。斯人去兮猿鶴散。幸茅亭之尚在。對魚幢之咫尺。而轉覺其空虛。生乃取介白之遺字。吾鄉徐高士白舊居于此。上舍請岷山徐吉士昂發大書介白之亭扁縣之。縣擘窠之大書。志先民之軌躅。作後學之範模。豈非仁心仁術。視富貴利達買宅者攸殊。今吾與諸子。飲食宴樂于此。倡子和女。安知後之游者。觀題壁之作。不曠世而相感。誦清風之穆如。重爲告曰。四坐莫誼。吾言不渝。諸君卜築。近在郊郭。吾獨寥寥。栖小長蘆。目極百里。何山可居。相生之宅。其樂只且。兄分布被。母御板輿。婦采蘋而采蘩。子耕菑而耕畬。烹泉則京挺都籃並載。入市則修琴賣藥非迂。郊關一舍。而近津渡。扁舟可呼。行不苦于趨。起策不藉乎翼。扶我舟弗勞。我僕免痛。訪翠墨而椎拓。揚黃卷而流輸。凡靈威所守。唐述

之儲。莫不籤題置笥。裝界開圖。爾雅釋寓。齷之屬。雖騷箋草木之疏。僕雖耄矣。耽與道俱。奇文疑義。猶冀相須。友直友諒。爲德不孤。思載家具。旁生層櫺。卜鄰晨夕。我與爾夫。

橋李賦并序

嘉興古之橋李也。橋遵爲切。許慎說文解字。從木。有所擣。賈思勰嫁李法。臘月中。以杖微打歧間。正月復打之。足子殆擣之義。與府治西南二十里。舊有橋李城。今蕪沒。李惟縣東十里淨相寺有之。近苦官吏需索。寺僧多伐去。將來慮無存矣。考之圖經。俱不載。因體物成篇。辭曰。

植物有李兮。應玉衡之星精。受命南國兮。特以橋名。產維揚吳會之交兮。載于魯春秋之經。旣殊河沂之黃建兮。亦不類房陵之縹青。夙傳九標之稱。允宜五沃之土。自空城之蕪沒。遷淨相之梵宇。獲要術于齊民。授靈方于老圃。甄著樹以分岐。犁不耕而用拊。當其溫風始至。法苑徐開。井上勿遺。螿食林間。恰有禽來。價方高乎朱仲。種不讓夫顏回。果熟偏蕃。枝低易拜。漿均玉乳之梨。品勝紅雲之柰。相珍果之離核。縣弱縷而虛中。異懷仁之桃杏。必待嫁而分叢。宜登玉盤。宜沉冰水。雪素瀉而並陳。配甘瓜而兩美。傳諸故老。一事矜奇。遇入吳之西子。臙脂之匯舟移。經纖指之一搯。量心賞之在斯。何造物之工巧兮。化千億于來茲。雖彼美之云亡兮。髣髴若或覩之。人情重故鄉兮。雖小物而增慕。矧俊味之得嘗兮。信土產之有素。悵圖經未之及兮。迺宣豪而作賦。

曝書亭集卷第二

古今詩一

旃蒙作噩

村舍二首

村舍朱生感遇作也。生年十七爲贅壻。避兵五兒子橋。

村舍有牛宮。架以曲尺木。牴牾盈四三。戀此共泥伏。牧童驅使行。跨之上原陸。日夕齊下來。各自舐其犢。吾生命不辰。早歲去邦族。父母謂他人。安敢望拊畜。吁嗟犢不如。寢訛從所欲。村舍有雞柵。樹近蓬門樞。曉日披其樊。一雌將衆雛。村嫗導之前。握粟呼朱朱。當前或更却。母啄子必俱。吾生早離家。南北忽相踰。父母謂他人。衆中益羈孤。吁嗟雞不若。骨肉長相須。

夏慕蕩二首

夏慕蕩前停釣輪。荒溝極浦易迷津。夕陽滿地北風起。飛遍蘆花不見人。干戈靜處見漁師。羨爾花源信所之。豈意叉魚艇子集。殺機不異銳頭兒。

過丘生

古今詩一

一一

丘生避地夏湖曲。獨伴流泉結書屋。茅柴酒薄留故人。破甑夜燒風折木。

柔兆闍茂

曉入郡城

輕舟乘間入。繫纜壞籬根。古道橫邊馬。孤城閉水門。星含兵氣動。月傍曉煙昏。辛苦鄉關路。重來斷客魂。

悲歌

我欲悲歌誰當和者。四顧無人。笑笑曠野。

過吳大村居

泛舟經谷口。迢遞入林端。一徑野煙夕。孤村返照寒。榴花赤瑪瑙。竹色青琅玕。滿酌主人酒。休歌行路難。

漫感

淮陰昔未遇。旅食昌亭年。薄俗愛惜費。晨炊固宜焉。哀哉趙元叔。日歎囊無錢。男兒雖落魄。寧受衆目憐。相逢游俠子。白馬黃金鞭。揖我入酒家。飲我斗十千。臨觴忽不御。拔劍心茫然。

暝

暝投人外宿。桑柘藹陰陰。獨樹歸禽少。平川隱霧深。松篁初月上。鐘磬夕陽沉。漸覺微風起。寥寥山水音。

平陵東

平陵東。蒿艾蓬。爾爲誰。劫義公。攢者金。伐者鼓。縛義公。大旗下。帳前力士頭。虎毛傳呼欲下五尺刀。如可贖。君歸賣白馬。我歸賣黃犢。

強圉大淵獻

捉人行

步出西郭門。遙望北郭路。里胥來捉人。縣官一何怒。縣官去。邊兵來。中流簫鼓官船開。牛羊橐駝蔽原野。天風蓬勃飛塵埃。大船義義駐江步。小船捉人更無數。頽垣古巷無處逃。生死從他向前路。沿江風急舟行難。身牽百丈腰環環。腰環環。過杭州。千人舉擢萬人謳。老拳毒手爭毆逐。慎勿前頭看後頭。

馬草行

陰風蕭蕭邊馬鳴。健兒十萬來空城。角聲嗚嗚滿街道。縣官張燈徵馬草。階前野老七十餘。身上鞭扑無完膚。里胥揚揚出官署。未明已到田家去。橫行叫罵呼盤殮。闌牢四顧搜雞豚。歸來輸官仍不足。揮金夜就倡樓宿。

北邙山行

北邙山前望行路。素車白馬紛朝暮。誰家丘墓樹龍嵒。白楊枌欂松柏桐。黃金爲鼻石爲馬。魚燈熒熒照泉下。古碑崩剝無歲年。後人於此犁爲田。雄狐僂僂兔矍矍。人聲夜哭烏聲樂。

春晚過放鶴洲

問訊裴公鳥。春來幾度遊。古牆修竹上。潭水落花浮。煙雨無人境。山泉放鶴洲。鳴夷今不見。往事問漁舟。

雨後卽事二首

暑雨涼初過。高雲薄未歸。泠泠山溜遍。浙浙野風微。日氣晴虹斷。霞光白鳥飛。農人乍相見。歡笑款柴扉。

野外

野外疎行跡。深林客到遲。江湖殊後會。風雨惜前期。秋草飛黃蝶。浮萍漾綠池。南樓夜吹笛。寥落故園思。

舟經震澤

澤國東南遠。樓船舊荷戈。明霞開組練。惡浪走蛟鼉。橫海將軍號。臨江節士歌。重來已陳跡。歎息此經過。

著雍困敦

董逃行

我欲上登崆峒。謁見仙人韓終。兩驂白鹿雲中。輕車超忽西東。駕者何人木公。旁有千載玉童。耳長覆髮。丰茸。天門闔者蘇林。復開闔闔招尋。青藍紫柱成陰。清風細雨吹襟。提壺設席盍簪。蒼龍白虎交臨。投壺六博無方。中筵促坐芝房。有美一人清揚。輕軀暢舞洋洋。宛若龍游鵠翔。清歌妙曲難忘。四坐歡樂未央。

瞳瞳日出博桑。

五游篇

崑崙有鳥。自名希有。東覆木公。西藏金母。一解飄風東來。吹我西征。路從弱水。阿母未經。二解雲車隆隆。土鼓逢逢。道逢仙人。言葬雷公。三解河鼓渡河。天孫設食。奔星馳驅。不見太白。四解方丈之山。其高五千。羣仙往來。不願升天。五解

少年子

臂上黑彫弧。腰間金僕姑。突騎五花馬。射殺千年狐。

雀飛多

雀飛多。飲啄野田裏。奈何卒逢黃鶴子。誰其救者彈以丸。何用報君雙玉環。玉環如可得。不惜黃花與爾食。

獨不見

青樓百尺狹巷旁。中有桂樹臨高堂。啼鳥自將八九子。鳴鶴散立東西廂。情人碧玉小家女。快馬瑯琊大道王。陽春三月獨不見。夜如何其守空牀。

曹三秀才 山秀讀書馨菴同吳大雷訪之遇雨留信宿

故人多寂寞。而子寄僧房。不見長相憶。因之暫裹糧。野雲停曲几。涼雨滴虛廊。欲問歸津渡。蒹葭一水長。

晚

白屋生寒早。蒼煙向晚陰。松門清磬遠。楓岸夕陽深。坐聽農人語。多諳靜者心。荆扉猶未掩。倚杖數歸禽。

題項叟聖謨畫柳

吾家舊宅由拳北。恰與胥山樵對門。巷柳蕭條今已盡。春風猶喜畫圖存。

胥山樵項叟自號也。

屠維赤奮若

春江花月夜

今夜江中月。兼花照水濱。春潮寒不起。定有弄珠人。

芳樹

芳樹不知名。當君階下生。三春三月暮。一雨一番晴。看舞山薌曲。聽吹玉笛聲。相思人不見。終日遶花行。

擬古

東鄰有女。自名碧玉。問年幾何。三六未足。言采柔桑。不盈一匊。愧無南珠。以慰心曲。原田有雉。艾而張羅。愛而不見。傷如之何。

靜夜思

靜夜涼風天氣清。開軒白露滋前楹。憂人佇立愁屏營。仰觀北斗懸高城。浮雲飄忽蒼煙平。誰家青樓葳蕤鑰。月寒沉沉夜飛鵲。

阿那瓊二首

黃塵起跋跋。乃自渭橋過。小袖織錦袍。足踏深雍鞞。問客家何方。揚鞭兩走馬。四角白虎幡。招搖來闕下。

那阿灘

聞歡當遠行。泣下不可止。大艫開江津。懊惱鐵鹿子。

烏棲曲

天河漫漫月流光。錦筵紅袖燈輝煌。城頭烏棲夜擊鼓。吳王更衣西子舞。

同作

嘉興王翊介人

深宮烏啼天未旦。城頭擊鼓明星爛。吳王讌罷星已希。繁霜落樹烏驚飛。

劉生

京華多俠客。勇略重劉生。一劍酬然諾。千金問姓名。歌鐘喧北里。冠蓋隘東平。聞道龍城戰。軍前更請纓。

當壚曲

吳姬春酒解當壚。隨意絲繩瀉玉壺。五馬漫誇秦氏女。雙鬢愁殺霍家奴。

小長干曲

江水東流急。風波正未安。郎今何處去。留妾小長干。

上章攝提格

同沈十二詠燕

節物驚人往事非。愁看燕子又來歸。春風無限傷心地。莫近烏衣巷口飛。

夏至日爲屠母壽

臨高臺。將進酒。君提壺。我鼓缶。君子且勿誼。小人鼓缶歌一言。我昔從東海上。親見上元夫人。指爪長長。鬢髮翩翩。吹瑤笙。擊石鼓。宴者誰有金母。投壺玉女爲客豪。青蚪白鹿相招邀。鍾山之李綏山桃。李如餅。桃如斗。得而食之皆老壽。今日高堂上。壽稱觴。一年三百六十日。三百五十九日無如此日長。

夏日閒居二首同范四路作

蘭草羅含宅。蓬蒿仲蔚園。桐陰初覆井。瓜蔓漸踰垣。歸鳥檐前樹。斜陽嶺上村。無家昧生計。漂泊信乾坤。草閣親魚鳥。江天滿芰荷。行吟多澤畔。晞髮自陽阿。傍水看垂釣。因風聽伐柯。高陽尋酒伴。乘醉亦來過。

放言五首

長門賣賦司馬。秦市懸書呂韋。吾生恨不能早。手載其金以歸。
步兵真成老卒。德祖亦是小兒。功名豎子先遂。詩賦壯夫不爲。
高士南州磨鏡。大夫吳市吹簫。男兒不妨混迹。何用匡居寂寥。
爲文思以冢葬。對客寧將硯焚。當年必無鍾子。後世定有揚雲。
種南山一頃豆。瞻西疇三徑松。耕桑若得數畝。吾豈不如老農。

八月十五夜望月懷陳大忱

明月生滄海。天橫一氣中。遙憐今夜客。相對與誰同。應有良朋過。銜杯學孟公。思之不得見。清露小庭空。

贈諸葛丈

旅館張燈夜未央。相逢跋扈少年場。同來大道朱樓上。並坐佳人錦瑟傍。白首悲歌非往日。青春把酒是他鄉。襄陽耆舊今寥落。乘醉還須問葛疆。

懷鄭明客淞江

連江楓樹外。煙水隔層波。歲暮飢寒逼。荒城雨雪多。故人居谷口。策馬去山阿。幾日離居恨。還應獨嘯歌。

寄家孝廉一是

懷歸當歲晏。木落徧江潭。作客應相憶。離羣自不堪。陰風連晦朔。寒日下西南。早晚依同病。窮愁意亦甘。

重光單闕

春日閒居

幽棲城市隔。好鳥亦來翔。閉戶野橋畔。讀書春草堂。有時敲阜帽。終日據繩牀。且貰鄰家酒。狂歌盡一觴。

懷朱山人扉

別時桂樹秋。相送衡門夜。不見所思來。春水生堂下。

語溪道中

小縣初成市。經春罷荷戈。陂塘湖水緩。桑柘石門多。入饌鵝兒酒。愁人阿子歌。見吳兢樂府解題蒲帆十八幅。一半客經過。

東飛伯勞歌

伯勞飛來燕飛去。參辰天上重相遇。誰家女兒十五餘。織成湘綺三條裾。迴身微步乍生塵。巧笑明眸善避人。鬱金爲堂桂爲柱。中庭新種相思樹。陽春已暮花漸稀。可憐高下從風飛。

樹萱篇

朱明四五月。萱草滿中園。花花連枝發。葉葉從風翻。解一移萱南湖濱。樹萱北庭側。亮無同心人。馨香詎相識。解二兔絲自有枝。桃葉自有根。黃花特小草。何用通慙。解三冶容無故慳。柔條易顛倒。本是忘憂花。翻成

斷腸草解

休洗紅

休洗紅。洗多紅漸白。人心初不同。愛好非前日。紅顏絕世衆所尤。美女入室惡女仇。

采蓮曲

采蓮女。兩槳橋頭去。錦石清江日落時。羅裙玉腕花深處。采蓮童。素舸游湖中。江謳越吹歌未歇。朱唇玉面來相逢。共道江南可采蓮。湖中蓮葉已田田。攀花風動飄香袂。照水萍開整翠鈿。翠鈿香袂逢人少。回看蘭澤多芳草。青鳥飛來啄紫鱗。白蘋斷處生紅蓼。雲起暮流長。飛花鏡裏香。雙雙金翡翠。一一錦鴛鴦。鴛鴦翡翠飛無數。蘭橈並著輕搖櫓。素藕連根絲更柔。紅蓮徹底心偏苦。誰家年少垂楊下。出入風姿獨妍雅。岸上徘徊七寶鞭。湖邊躑躅千金馬。淥江腸斷起歌聲。惆悵方塘一望平。水上輕衣吹乍溼。風中細語聽難明。沙棠舟繫青絲紵。相邀盡說江南樂。白露初看翠蓋飄。秋風漸見紅衣落。橫塘燈火采蓮歸。隔浦歌聲聽已希。雲間月出開煙樹。惟見沙明白鷺飛。

寄胡明府振芳

老去甘垂釣。秋深歎轉蓬。虛堂驚蟋蟀。涼露滿梧桐。隱吏思梅福。忘年得孔融。飄零方有日。清宴幾時同。

雞鳴

東方未白雞長鳴。離人束帶步前楹。中閨切切再三語。曉寒入室燈光清。家童驅雞誤相觸。脰脰膊膊飛上屋。

讀曲歌

素藕生池中。紅荷浮水面。與汝同一身。本自不相見。

華山畿三首

華山畿。弩張不發箭。知子未投機。兩相望。儂非弧矢星。安能長對狼。奈何許。安得鳳凰子。迎接儂與汝。

游仙三首

東土非吾好。西征豈憚勞。何能從桂父。且自學盧敖。入水騎龍竹。耕煙種鴨桃。不知閩風去。員闕幾重高。八桂何時植。雙鸞此日鳴。然犀分水族。懸鏡照山精。片石臨河見。浮槎貫月行。心知逢織女。不待問君平。少小璇宮織。當牕機九張。天孫分重錦。價直百千強。欲渡明河去。牽牛不服箱。謫來北斗下。無計挹仙漿。

臣里

臣里東家子。生來十指柔。已矜能挾瑟。不自解梳頭。蠟淚挑珠鳳。風簾控玉鈎。日長消午夢。鬪草及春游。

玄默執徐

南湖夜聞歌者

輕舟暗度古城東。惆悵霜天落塞鴻。誰向夜深歌水調。傷心不待管絃終。

舟次平望驛

舟人爭利涉。日夕更揚舲。一水分平望。羣山接洞庭。風來潮約約。煙積雨冥冥。愁聽嚴更發。中宵尙未寧。

楓橋夜泊

初月開平林。繁星羅遠戍。驚禽沙上鳴。漁子夜深語。遙聞歌吹聲。暗入楓橋去。

治平寺

招提下山路。一徑轉迴塘。塔影開初地。鐘聲落上方。陰崖深樹綠。斜日亂峰黃。湖上扁舟興。沉吟意不忘。

中峰尋讀徹上人遇

中峰藤蘿上。亭午傳齋鐘。無復憚長路。因之策短筇。山明石齒齒。樹暗雲容容。不見支公鶴。相隨塵外蹤。

白紵詞二首

吳王宮中夜欲闌。秋江露白芙蓉殘。青娥二八羅裳單。左鋌右鋌何娑盤。明星滿天月三五。城頭坎坎夜擊鼓。君王既醉不知音。猶向燈前作歌舞。

天橫北斗夜沉沉。美人並進揚清音。白紵輕衣香氣深。玉釵亂墮無人尋。此時但恐君恩竭。急管繁絃那能歇。明燈忽滅烏夜啼。醉起更衣滿江月。

江亭

楊柳官亭外。春來送客頻。傷心車馬地。淚盡復生塵。

古興二首

空井雙桐落葉深。銅餅百丈響哀音。美人不見涼風至。愁對秋雲日暮陰。
羅生芳草綠汀洲。少婦明妝北渚游。日暮清歌何處發。蘋花秋水木蘭舟。

哭萬兒

提攜猶昨日。髣髴憶平生。夜火銅盤淚。春風竹馬聲。無錢輕藥物。瀕死念聰明。迢遞黃泉道。沉沉慟汝行。

送王翹游粵

好去羊城道。吁嗟契闊深。離羣空悵望。惜別重登臨。零雨哀南土。晨風念北林。征途祭酒客。天末渡江吟。
煙火蠻鄉少。山雲驛路陰。枕榔交嶺樹。孔雀擾家禽。去問楊孚宅。歸看陸賈金。梅花如可寄。幸慰故人心。

立秋後一夕同睦修季俞亮朱一是繆永謀集屠爨齋

涼風吹細雨。蕭瑟度庭陰。把袂來何暮。當杯夜已深。天邊同落魄。江上獨愁心。誰念新亭淚。飄零直至今。

送袁駿還吳門

袁郎失意歸去來。彈缺長歌空復哀。天寒好向汝南臥。酒盡誰逢河朔杯。遠岸楓林孤櫂入。平江秋水夕陽開。要離墓上經過地。知爾相思日幾迴。

題畫四首

林深屐齒未曾經。萬壑松濤偶坐聽。我若支筇來此地。便攜酒榼上茅亭。綠蕪遠近山參差。露氣暗浮松樹枝。烏篷七尺屢回首。看到月明歸未遲。長林楓葉早霜催。絕磴鳴泉激石迴。料得山樓聽不盡。絃桐欲寫又徘徊。竹梢藤蔓淨飛沙。冷翠疎林不著花。羨殺幽人此高臥。更無剝啄到山家。

集句題王女史畫蓮

可愛深紅間淺江。滿池荷葉動秋風。縈迴謝女題詩筆。一片西飛一片東。

昭陽大荒落

卽席送王廷璧朱士稚同之松江

楊柳青青覆板橋。春江花月夜生潮。停杯又是他鄉別。無那相思一水遙。

遣悶

一雨竟十日。蕭條成暮春。歡娛那有地。歲月漸過人。煙草天邊路。風花陌上塵。良游如可再。尊酒莫辭頻。

閑情八首

邂逅重門露翠鈿。娉婷不嫁惜芳年。徒勞暇日窺香掾。漫想橫陳得小憐。洞口桃花何灼灼。江南蓮葉更

田田。輸他三戶人。僥倖載上胭脂匯。畔船。胭脂匯在構李相傳范蠡載西施處。

生來里是比肩名。兩美須知定合并。北地佳人矜絕世。西鄰名士悅傾城。何緣珠樹成連理。便擬香車駕六萌。不分秦臺漏消息。玉簫先有鳳凰迎。

家臨大道不難知。夾岸楊枝踈地垂。春水白魚多比目。秋風紅豆最相思。飛龍藥店虛存骨。走馬章臺孰畫眉。多事定情繁主簿。山南山北淚連絲。

宛轉吳歌別有腔。蜻蛉舟小露紅窗。梅花日暮風吹樹。桃葉春深夜渡江。荀令香消煙寂寂。何郎燭暗影幢幢。思憑謝女題詩筆。畫作輕鸞六百雙。

蓮花細步上蘭階。徐整同心七寶釵。入室便應金作屋。當壚須得酒如淮。身前容易風吹袖。夢裏分明月墮懷。五角六張看過了。何愁作事兩難諧。

舍後方池一水流。鴝鵒鷓鴣驚信沉浮。從教露井生桃樹。更遣中庭種若榴。錦段未通千里字。玉簫猶隔幾層樓。不知桑葉城南路。五馬寧能共載不。

水北花南路不紆。形相色授兩心輸。莫須遠結千絲網。且緩平量十斛珠。大婦亦憐中婦豔。新人定與故人殊。鴛鴦有分成頭白。肯許飛還野鴨俱。

一自神珠別漢臯。經春不見意徒勞。門前種樹名烏臼。水上飛花盡碧桃。三里霧同千里遠。九重樓恨十重高。無因得似紅襟燕。恣拂簾鈎日幾遭。

渡黃浦

極浦連天闕。驚濤壯海門。揚舲辭驛路。放溜入雲根。白霧魚龍伏。蒼煙日月昏。樓臺朝作市。雷雨暗翻盆。疏鑿千年久。舟航萬里奔。摩霄盤野鶴。吹浪湧江豚。杳渺通長島。虛無出遠村。祠因黃歇起。葺以陸機存。上客今何在。高文不可論。乘槎應未得。搖落問乾坤。

龍潭曉發

曉發白龍潭。移舟綠楊岸。篙師暗中語。行客水邊飯。雞鳴潮始來。月落天未旦。冥冥煙霧生。稍稍城鴉散。乘風萬里外。擊楫中流半。慷慨游子心。臨江起長歎。

嫁女詞

嗟嗟重嗟嗟。鴛鴦隨野鴨。誰家可憐窈窕娘。容顏精妙難意量。大姑生兒仲姑嫁。小姑獨處猶無郎。媒人登門教裝束。黃者爲金白者玉。阿婆嫁女重錢刀。何不東家就食西家宿。

七夕詠牛女二首

浪傳靈匹幾千秋。天路微茫不易求。今夜白榆連理樹。明朝銀浦斷腸流。
瓜果中筵笑語微。西樓涼月夜開扉。無因得泛浮槎去。親向天孫乞巧歸。

南湖卽事

南湖秋樹綠。放櫂出迴塘。簫鼓聞流水。蒹葭泛夕陽。心隨胡雁滅。目斷楚雲長。惆悵佳人去。憑誰詠鳳凰。

送林佳幾還莆田

高樓置酒觴。今夕愁聽驪歌送。行客搖落深知羈旅情。飄零況是雲山隔。林生磊落無等倫。鳳雛驥子誰能馴。一朝忼慨辭鄉里。幾載飢寒傍路人。平生崔嵬好奇服。流離恥作窮途哭。往往詩歌泣鬼神。時時談笑驚流俗。林生林生骨相奇。昂藏不異并州兒。看君富貴當自有。不合憔悴留天涯。高秋別我閩中去。行李蕭條慘徒御。客舍清江萬里船。鄉心紅葉千山樹。九里湖邊倚翠屏。穀城山下俯清泠。寒風江路兼山路。落日長亭更短亭。嗟予分手天南遠。惆悵河橋送君返。遠客休辭行路難。高堂應念還家晚。

送十一叔游中州二首

木葉下亭臯。西風一雁高。驅車千里道。結客五陵豪。河水浮官渡。關門鎮虎牢。驪駒方在路。尊酒意徒勞。
旅館涼風起。秋城畫角哀。天涯方遠客。祖道且深杯。山色陰中岳。河流繞吹臺。梁園多雨雪。歲暮好歸來。

送通門和尚住持太白山

越山東望路迢迢。澗口寒藤度石橋。惆悵空林飛錫遠。海門秋雨浙江潮。

送屠爨入閩

故人千里去。風雪上行車。南浦悲長路。西河歎索居。江猿啼遠近。天水入空虛。莫作經年別。高堂正倚闔。

逢姜給事塚

黃門先生官左掖。力欲拔山氣辟易。虎豹天關閉九重。孤臣血肉徒狼藉。東萊蜃市易沉淪。南國相逢淚滿巾。青鞵布韞江湖外。誰念當時折檻人。

簡陳秀才光繹

幾日秦嘉去。應留贈婦篇。盤龍明鏡好。雙笑玉臺前。

長安賣卜行贈吳三統持集杜句

翻手作雲覆手雨。長安布衣誰比數。天涯涕淚一身遙。避地何時免愁苦。男兒性命絕可憐。實籍君平賣卜錢。身上須繒腹中實。長安市上酒家眠。酒酣拔劍肝膽露。勾陳蒼蒼玄武暮。人生萬事無不有。世人那得知其故。揚眉結義黃金臺。亦知窮愁安在哉。可憐懷抱向人盡。黃帽青鞵歸去來。寂寞江天雲霧裏。舍南舍北皆春水。龐公隱時盡室去。我獨何爲在泥滓。強移棲息一枝安。百遍經過意未闌。復有樓臺銜暮

景也。從江檻落風湍。多才依舊能潦倒。百壺且試開懷抱。但覺高歌有鬼神。不知明月爲誰好。吾兄吾兄。巢許倫路難悠悠。長傍人可憐。爲人好心事。終日坎壈纏其身。

無題六首

金谷繁華地。風流石季倫。量珠凡幾斛。買取墮樓人。
織女牽牛匹。姮娥后羿妻。神人猶薄命。嫁娶不須啼。
夢逐山頭去。身從掌上迴。黃金如結屋。先築避風臺。
月映凌波韞。風飄出水衣。莫教仙犬吠。花下阮郎歸。
漢臯珠易失。洛浦珮難分。不及閒男女。肩挑六幅裙。
養就芙蓉粉。勻成十樣牋。相思無別語。只解勸歸船。

哭王處士翹六首

書信傳初到。銘旌已在途。今來紛涕淚。昔別念須臾。迢遞悲長道。艱難喪老儒。山陽懷舊賦。流恨滿江湖。
遠道將歸客。孤舟返舊林。招魂迷楚水。臥病絕吳吟。夢裏羅含鳥。囊中陸賈金。猶憐別時語。悽斷故人心。
江海飄零日。秦川喪亂餘。淒涼蒿里曲。生死秣陵書。零雨沾青草。高原哭素車。南山桂搖落。無復子雲居。
知己從今少。平生負汝多。人生看到此。天道復如何。流水笳簫曲。悲風薤露歌。王猷竹林在。舊徑不堪過。

落日明丹旆。飄風卷繡帷。途窮偏作客。身老獨無兒。書籍今何託。人琴不可知。高山空有調。回首失鍾期。相送悲長別。還家慘獨行。流連簡書札。次第念交情。自有篋中作。何難身後名。泉臺應快意。未必似平生。

曝書亭集卷第三

古今詩二

闕逢敦牂

同舍人五兄登觀山頂

杖策荒塗外。憑高遠樹重。微茫開積水。縹緲見孤峰。細雨春歸鴈。深山日暮鐘。何年共招隱。相伴入雲松。

送王訪遊嶺南

送君西去大江深。回首雲煙楓樹林。嶺路千山萬山外。相思孤月夢中尋。

寄懷徐孝廉之瑞

憶別吳山事隱淪。相思煙草歷冬春。餘杭溪水空千尺。不見雙魚白錦鱗。

贈別王山人元慧

王猷原愛竹。圖畫得天真。老去貧尤甚。年來妙入神。與余情不淺。傾蓋日相親。紈扇題教遍。屏風點更新。蕭疎抽直幹。蒼翠染叢筠。雨暗瀟湘夕。煙浮鄠杜春。枝柯紛異色。水石盡堪珍。國史傳文苑。君家有舍人。舍人名絨。善畫竹。不苟作。嘗退朝。黔國以雙縑索畫。呼之不應。至三年始致之。又月夜聞鄰人吹簫。因圖人幅與之。曰。以簫材報汝。其人更求別幅。并前畫裂之。風流存髣髴。清切典絲

綸散直矜通籍。吹簫狎比鄰。一朝翻毀裂。萬里幾逡巡。能事原殊俗。當時信絕倫。昔賢從脫略。似爾實悲辛。白髮重湖海。青山廢隱淪。狂歌老藤杖。醉脫小烏巾。不厭經過密。惟應歎息頻。物情輕一藝。有識定千緡。相賞知何地。思歸及此辰。郊扉餘舊業。雲壑息勞筋。早晚扁舟就。三江共采蓴。

示弟彝玠

攤書仍不學。萬慮亦徒然。就市非長策。躬耕少薄田。請纒今日事。作賦幾時傳。莫效諸兄嬾。蹉跎媿昔年。

彝公過

遲客無三逕。浮杯自獨園。林棲堪永日。瓢飲坐忘言。竹戶青蟲網。荷風翠鳥翻。更看涼月上。徙倚向南軒。

七月八日夜對月

素月弦初直。清宵漏轉添。乍堪盈手贈。無復兩頭纖。影動明河鵲。涼生碧海蟾。玲瓏看不定。試上水晶簾。

得譚七表兄吉璉西陵書集杜

鰕菜忘歸范蠡船。斷腸分手各風煙。更爲後會知何地。自斷此生休問天。縱酒欲謀良夜醉。將詩不必萬人傳。江山路遠羈離日。郭外誰家負郭田。

俞汝言移居八首集杜

亂後居難定。臨江卜宅新。入門高興發。對酒滿壺頻。爲客裁烏帽。呼兒正葛巾。平生飛動意。披豁對吾真。

寂寞書齋裏。幽偏得自怡。美花多映竹。小水細通池。丘壑曾忘返。招邀屢有期。論文或不媿。步履過東籬。田園須暫住。版築不時操。落景聞寒杵。牆頭過濁醪。雜花分戶映。亂石閉門高。試問垂綸客。吾何隨汝曹。簡易高人意。村花不掃除。日長唯鳥雀。客至罷琴書。曬藥安垂老。鈔詩聽小胥。由來意氣合。歲晚莫情疎。卜宅從茲老。幽居不用名。倒衣還命駕。高枕笑浮生。弟子貧原憲。諸公厭禰衡。看君多道氣。攜手日同行。隱者柴門內。無村眺望賒。圓荷浮小葉。秋竹隱疎花。帖石防隕岸。傾壺就淺沙。何時一茅屋。來問爾東家。牀上書連屋。庭中藤刺簷。看君用幽意。勝槩欲相兼。棗熟從人打。杯乾自可添。此時同一醉。與汝定無嫌。滿目悲生事。終朝有底忙。世人皆欲殺。詞客未能忘。回首驅流俗。過逢類楚狂。吾生無倚著。配爾亦茫茫。

懷黃十三 俠客園

八月霜清木葉飛。關河秋望淚沾衣。寒山桂樹今搖落。惆悵王孫尙不歸。

鸞脰湖寄周四 吉亥

鸞脰湖邊水。臨流好結廬。桑麻深杜曲。雞犬擾秦餘。紅葉層層樹。銀花寸寸魚。耦耕兼有伴。暇擬著叢書。

八月十三日夜汎月太湖

爲愛清秋月中流。獨扣舷。艱難羣盜路。寂寞五湖船。白髮從今夜。青山憶往年。酒闌愁不寐。相願意茫然。

十七日夜月

待月涼宵靜。更深醉玉缸。空城懸北斗。流水入西江。落葉紛無數。驚鳧起一雙。高樓思蕩婦。茲夕定當牕。

旅興呈舍人五兄二首

舊宅烏衣巷。涼秋白苧歌。湖山歸路遠。風雨閉門多。暗壑隱松桂。深潭漂芰荷。美人日遲暮。芳草奈愁何。旅館三秋客。端居百慮違。張衡長不樂。王粲竟無依。夜月彈長鈇。涼風歎短衣。天涯芳草盡。我馬亦懷歸。

寂寞行

寂寞復寂寞。四壁歸來竟何託。男兒不肯學干時。終當餓死填溝壑。布衣甘蹈湖海濱。飢來乞食行負薪。不然射獵南山下。猶勝長安作貴人。

九日同張輿繆永謀集錢汝霖宅分賦

魯酒飲未醉。商歌調復勞。百年齊下淚。九日罷登高。短髮參軍帽。重寒范叔袍。舊來飛動意。空羨五陵豪。

旃蒙協洽

謁廣陵侯廟井序

錢塘江干有廣陵侯廟。其來古矣。乙未三月。將之越中。問渡展謁廟下。按枚乘七發。觀濤於廣陵之曲江。世疑廣陵國爲今揚州府治。然元季錢思復試羅刹江賦。證曲江卽浙江。楊廉夫隲之時。號曲江處士。而曾子固撰越郡趙公救災記中。有廣陵斗門。合之伍子之山。胥母之場。疑義可析。因賦絕句紀之。江月松

風者思復自題其集名也。

昔聞江月松風客。賦證錢唐是曲江。不見郊關廣陵廟。靈風長拂舊旛幢。

固陵懷古

越王此地受重圍。置酒江亭感式微。想像諸臣紛涕淚。淒涼故國久睽違。天寒竹箭參差見。日暮烏鸛上下飛。猶羨當年沼吳日。六千君子錦衣歸。

蕭山道中

古樹參差暗。春禽旦暮鳴。東西開水市。高下築山城。翠竹千家靜。清江二月平。昔賢栖隱地。巖壑有同情。

梅市

仙吏經過處。空江日夜流。何年市門去。千載渺難求。竹暗清溪路。沙明白石樓。羈鴻與孤客。歸思兩悠悠。

鑑湖

狂客當年歸四明。經過遺跡不勝情。澄湖一曲明如鏡。身在山陰道上行。

雨坐文昌閣

芳草辭南浦。晨風寄北林。佳人天路隔。帝子水雲深。風雨他鄉別。羈愁薄暮心。冬青已無樹。忍向六陵尋。

借謝晉吳慶楨登倪尚書衣雲閣

閣初成日倪公譙漳浦黃公於此

飛樓跨百尺。畫棟長氤氳。我來借客一延佇。置身髣髴雲中君。憶昔樓成時。尙書歸田里。北海方看尊酒開。東山終爲蒼生起。自從龍馭歸鼎湖。公亦仗節死京都。子規燕市尋常見。白鶴遼東歲月徂。十餘年間亭已壞。游客經過增感慨。噫吁嘻。黃公授命大中橋。魂兮欲歸不可招。千門白下總蕭瑟。何況尙書一塵室。請君下樓歌莫哀。回首高城月東出。

謁大禹陵二十韻

夏后巡游地。茅峰會計時。雙圭開日月。四載集輶櫟。國有防風戮。書仍宛委披。貢金三品入。執帛萬方隨。相古洪流割。欽承帝曰咨。寸陰輕尺璧。昆命有元龜。自授庚辰籍。寧論癸甲期。清都留玉女。惡浪鑿支祁。荒度功攸賴。平成理自宜。神姦魍魅屏。典則子孫貽。明德由來遠。升遐亦在茲。丘林無改列。弓劍祇同悲。回首辭羣后。傷心隔九疑。鳥耘千畝徧。龍負一舟移。斷草山阿井。空亭嶽麓碑。芒芒懷舊跡。肅肅禮荒祠。黃屋神如在。桐棺記有之。筵誰包橘柚。隧或守熊羆。共訝梅梁失。因探窆石遺。竭來憑弔處。拜手獨陳辭。

南鎮

稽山形勝鬱岩峽。南鎮封壇世代遙。絕壁暗愁風雨至。陰崖深護鬼神朝。雲雷古洞藏金簡。燈火春祠奏玉簫。千載六陵餘劍鳥。帝鄉魂斷不堪招。

晚過寶林山寺

相傳山自鄒那東武海中一夕飛至人民皆徙焉

春風從何來。吹彼芳樹枝。客心坐惆悵。日夕千里思。出門異南北。獨往任所之。眷言登茲山。已見西日馳。羣峰趨戶外。出沒成參差。置身空濛間。恍忽飛來時。向下聽雞犬。極視窮高卑。沉沉西林路。光闇從此辭。回瞻白雲合。林外鐘聲遲。

遶門山

修途緣廣隰。川暝高煙平。迢迢前山路。落日西林明。舍舟復登陸。慰我巖壑情。斧斤山林外。白石丁丁鳴。危梯懸木杪。幽谷聞人聲。陰晴古壁暗。高下蒼崖傾。或見山火出。時聞猿鳥驚。平看雷雨黑。下視源潭清。微風吹素浪。日夕沄沄生。山田足禾黍。水石明柴荆。何年此幽棲。深謝世上名。無爲在城市。戚戚多所營。

舟中望柯山

朝光麗華薄。清川蕩浮瀾。橫楫臨江臯。流目肆遐觀。丹葩眩重谷。素雲冒曾巒。我行旣遲迴。顧景多所歎。青林翳巖桂。香風過崇蘭。空亭邈孤高。修竹自檀欒。緬懷古之人。知音良已難。

蓬萊閣晚望

源水桃花樹樹。春風燕子家家。目斷江南歸思。愁人不在天涯。

再過倪尙書宅題池上壁

尙書池館古城邊。卷幔山光繞座前。一自鼎湖龍去後。難期華表鶴歸年。石廊細雨生春草。蒿里悲風起

墓田。枉付尼師作精舍。粥魚茶版此安禪。

若耶溪

若耶溪頭春水深。南風北風樵采音。浣紗女兒不得見。清江日暮愁人心。

叢山亭子

石磴層層上。憑高四望同。君王遺跡在。寂寞古亭空。綠水人家外。青林島嶼中。昔年生聚日。辛苦舊江東。

弔王義士

毓著義士受學于都御史劉公宗周。公聞南都不守。絕食義士上書于公曰。慎勿爲王炎午所笑。乃衣儒巾藍衫。投柳橋下死。與義士先後死者潘生集。周生卜年。

中丞弟子舊家風。杖屨相隨誓始終。閉戶坐憂天下事。臨危真與古人同。短書燕市遺丞相。餘恨平陵哭義公。此地由來多烈士。千秋哀怨浙江東。

岳忠武王墓

宋室偏安日。眞忘帝業艱。但愁諸將在。不計兩宮還。鄂國英雄士。淮陰伯仲間。策名先部曲。薄伐自江關。赤縣期全復。黃河度幾灣。龍庭生馬角。雪窖視刀鐃。城下盟何急。師中詔已頒。盈庭尊獄吏。囊木謝朝班。相狡妻兼煽。和成主愈孱。長城墮道濟。大勇器成颯。舊井銀餅失。高墳石虎閒。銘功存版碣。鑄像列神姦。曠世心猶感。經過淚獨潸。傳聞從父老。流恨滿湖山。朔騎頻來牧。南枝尙可攀。墓門人寂寞。江樹鳥緡蠻。宿草經時綠。秋花滿目斑。依然潭水月。終古照潺湲。

表忠觀

城邊碧瓦樹靈旂。廟口明湖濯翠微。罷聽緩歌歸夜月。獨存豐碣對閒扉。錢塘白馬迴犀弩。玉座青苔上錦衣。保障東南功不細。祠官異代豈相違。

歸

江南春事早。二月已飛花。眼見芳菲盡。吾生信有涯。妻兒空待米。風雨獨還家。自斷無長策。何勞感歲華。

橫山蛟潭

雲根雁齒階。旁覩怪石裂。傳聞此山隅。有蛟出自穴。崖傾箭栝門。水暗玄黃血。不見下山人。惛悵芳菲節。
山爲顯况舊居。有讀書臺。下山歌云。日日兮春風。芳菲兮欲歇。况所作也。

歸次西小江行舟被捉夜宿蔡村田舍二首

石壕逢小吏。日暮捉人船。斷續清江樹。冥濛細雨天。一身無倚著。三命苦連遭。亟把迷津問。蕭山何處邊。
野老原頭立。逢迎禮數增。江村寒抱被。茅屋夜張燈。兵革愁何極。桑麻話未能。爲言官道近。一舍是西興。
擬古折楊柳辭

手折楊柳條。倒樹孟津河。十年來繫馬。楊柳今婆娑。

同作

山陰祁班孫

上馬不執鞭。但折楊柳枝。出門不垂淚。但歌楊柳辭。

對月簡周 實繆 永謀

楓林初落日。秋露漸沾牕。仰視明月。遙臨湛湛江。游思陶謝並。客有阮何雙。待發清溪櫂。相要醉玉缸。

柔兆涪灘

山陰道歌送沈十二進

我從山陰來。卻憶山陰道。客舍高歌一送君。江南愁思盈芳草。芳草碧迢迢。離人千里遙。青山謝公屐。白馬伍胥潮。潮來潮去春江路。行車遠發西陵渡。雲暗清溪梅市空。風吹修竹柯亭暮。迤邐鏡湖邊。中流記采蓮。樵風空舊跡。沉釀自成川。誰家青翰長相見。何處紅妝不可憐。溪風橋雲門寺。流泉淙淙石齒齒。我昔愛奇未到此。送君遠游從此始。直上秦山望海水。

送舍弟 彝鑾之山陰

別情不可道。送汝益淒其。分手悵前路。離居感後時。山中伯禹穴。江上伍胥祠。何處無芳草。池塘遶夢思。

午日吳門觀渡

勝日銜杯罷。輕舟解纜初。盡傳迎伍相。不比弔三閭。畫舫龍鱗見。飛樓蜃市居。雲濤看震盪。雷雨任吹嘘。別有張筵客。相邀吳市墟。王孫五花馬。少婦六萌車。芳樹晴川外。平沙夕照餘。泉聲聞絲竹。人影亂芙蕖。

爲樂時將晚。當歌恨不除。閭閻成土俗。天地感權輿。江表遺風在。承平舊事虛。吾生多涕淚。高會輒歔歔。
將游嶺南留別故園諸子

驪駒長路起秋塵。遠客清樽不厭頻。握手相看猶未醉。滿堂明月照離人。

錄別

飄飄山上雲。泱泱溝中水。居人語前除。行子夜中起。攬衣候雞鳴。束帶復隱几。上堂辭嚴親。入室慰妻子。
戚戚對弟昆。依依向鄰里。臨當掩柴扉。行復顧桑梓。睠彼雙飛鴻。徘徊不能已。

金山登妙高臺

高臺堪極目。落景一登臨。衆水金陵下。孤城鐵甕深。平沙依鴈宿。橫笛想龍吟。不見安禪叟。寥寥江上心。
秣陵

秣陵城闕暮雲封。估客帆檣落日逢。萬里星霜沙塞鴈。五更風雨掖門松。長江鐵鎖空千尺。大道朱樓定
幾重。此夕愁人聽鼓角。驚心不似景陽鐘。

采石

采石磯邊積雪晴。橫江館外暮潮生。金陵美酒百斛盡。明月滿江空復情。

小孤山

北船乘長風。南船載柔櫓。篙師戒晨征。渡口動津鼓。霧淨開孤峰。沙明橫極浦。逶迤經前山。日色未亭午。半嶺界樓臺。參差近可覩。離離金碧光。窅窅神靈雨。遠望空愁心。沿流采芳杜。

大孤山

兩孤去百里。宛在中流半。匪獨形勝殊。氣亦變昏旦。天梯鬼斧開。廟火神鴉散。昭昭雲月輝。歷歷明星爛。空水既澄鮮。浮光亦凌亂。飄飄御冷風。恍忽度銀漢。未有歸與情。空深逝者歎。

舟中望廬山

昔予志名山。夢寐五老峰。今茲遠行邁。舟楫欣來逢。中流望員闕。隱見金芙蓉。空翠非一色。飛雲渺千重。歷歷澗中水。青青崖上松。所嗟限于役。策杖誰相從。空愁石梁在。緬懷虎溪蹤。巖棲不得遂。惆悵東林鐘。

望湖亭對月

山色匡廬近。湖光彭蠡開。異鄉頻見月。孤客乍登臺。遠樹霧中失。浮雲川上來。離心似黃鵠。中道一徘徊。

封谿聶侯廟

返照封谿上。停橈思惘然。地傳白鹿渚。人記赤烏年。簫鼓迎神曲。帆檣送客船。誰令戎馬日。萬里入南天。

灘行口號六首

白鷺洲前動客愁。黃公灘畔駐行舟。誰開瘴嶺天邊路。惟見清江石上流。

銅盤灘急水西東。兩岸高山四面風。絕壁倒飛巫峽雨。懸流直下呂梁洪。
黃茅峽外野人居。潭影空明漾碧虛。長箭短衣朝射虎。鳴榔持火夜驚魚。
斷壑陰崖百丈牽。斜風細雨萬山連。長年三老愁無力。羨殺南來下瀨船。
紅霞深樹嶺雲平。兩槩戈船石罅行。浦口清猿催客淚。一時齊作斷腸聲。
羊腸鳥道幾千盤。設險寧惟十八灘。見說一灘高一丈。直從天上望南安。

虔州懷古

橫浦樓船靜。西風草樹彫。城荒百戰在。地入九江遙。豪傑爭先後。山陵慘寂寥。
鬱孤臺下水。流恨自南朝。

南安客舍逢陸郡伯兄世楷以滕王閣詩見示漫賦

憶昨君從柘湖至。揚舲爭發吳趨市。京口相逢借問君。橫舟揚子江心寺。
晴雲縹緲散碧空。歛忽破波生長風。孤舟如巨魚。鼓鬣洪濤中。川原迢遞不可極。
布帆飄忽隨西東。我從鹿渚超長薄。君到洪都更棲泊。遠望開襟彼一時。
憑高獨上滕王閣。茲樓崛起天下雄。珠簾繡柱垂文虹。當年王師此高宴。
一時詞賦推羣公。留題真蹟不可見。煙雲過眼須臾變。古來文采光燄長。
千載王郎信堪羨。君家兄弟才難伍。甫里聲名動江左。揮毫落紙氣凌雲。
坐令長才失千古。我亦天南萬里行。白衣搖櫓度江城。閒雲潭影徒回首。
南浦西山空復情。大庾城邊日將酉。下馬逢君復攜手。座上新開北海樽。
客中飲我蘭陵酒。酒闌相示絕妙

辭九莖勝食齋房芝。曲終定有湘娥怨。讀罷如聞帝子悲。當前勝地不得上。使我沉吟一惆悵。舟楫重過定幾時。雲山滿目知無恙。明發梅花嶺外看。長從驛使報平安。側身天地多知己。且莫頻歌行路難。

度大庾嶺

雄關直上嶺雲孤。驛路梅花歲月徂。丞相祠堂虛寂寞。越王城闕總荒蕪。自來北至無鴻鴈。從此南飛有鷓鴣。鄉國不堪重佇望。亂山落日滿長途。

潁陽峽

吳山多逶迤。粵山獨嶄嶄。壁立千仞餘。洞壑俯穹嵌。子午見日月。朝夕鳴松杉。天風一以至。蕭瑟吹江帆。懸崖答長嘯。空翠濕征衫。側聞飛仙度。遠見浮雲銜。何當斲靈藥。坐惜無長錢。

香爐峽

何年香爐峽。擅此香爐名。匡廬與會稽。秀色同削成。篁徑散彩翠。溪流澹澄明。青雲結車蓋。白日懸霓旌。孤舟泛容與。百丈紛縱橫。人影如沙蟲。林林川上行。夕陽下長坂。猿鳥盡哀鳴。征途渺何極。惻惻使心驚。

大廟峽

連山何迢迢。迢迢夕陽外。我行會幾時。虛舟入青靄。崖傾斷車箱。廟古陰松檜。遙見靈旗翻。微風響清籟。川光與天容。上下如衣帶。纍纍白石明。窅窅浮雲晦。日夕故鄉心。山川渺吳會。

羚羊峽

泠泠高峽水。際曉煙光微。一聞征橈發。宿鳥皆驚飛。浦樹旣迢迢。山雲亦依依。谿迴修竹靜。日出行人稀。雙崖信奇峻。屹立如重圍。猿獠相叫嘯。水石湛清輝。遂令游子心。萬里亦忘歸。林棲如可得。願息漢陰機。

寄遠

南風日夕度江潭。旅夢還家路未諳。寄語寒衣休憶遠。更無霜雪到天南。

強園作詠

元日陰

黯黯窮陰合。蕭條歲序遷。故鄉應雨雪。絕域尙烽煙。更憶高堂上。頻思遠信傳。辛盤空自好。誰爲介樽前。

首春端州述懷寄故鄉諸子

客舍千山外。春城萬里心。草青仍一度。雲暗結重陰。往事隨蓬轉。謀生愈陸沉。承歡違菽水。兄弟渺商參。負米情空在。離鴻思不禁。此邦非樂土。何處好懷音。枉作窮途哭。虛勞澤畔吟。蒼梧晴峽遠。桂水暮流深。夢斷梅銷嶺。囊空陸賈金。楓林悲落月。苔石憶同岑。燕笑應如昨。沉吟獨至今。北歸徒躑躅。南望益蕭森。瓊樹佳人隔。梅花驛使臨。短書知可報。珍重問江潯。

珠江午日觀渡

蠻歌撫節下空江。畫舸朱旗得幾雙。想像戈船猶漢日。忽驚風土異鄉邦。芙蓉遠水迷花渡。琥珀深杯覆酒缸。近市青樓經亂盡。知無紅粉出當牕。

五羊觀

中天臺殿倚南溟。玉珮雲衣散百靈。瘴雨不開煙樹黑。驚濤直下海門青。騎羊舊說朝仙馭。銜穀何年降楚庭。歎息遺墟今寂寞。高林空度羽人經。

篷軒落成曹方伯濬招飲納涼卽席分韻

卷幔溪光夕。開軒露氣澄。參差交月樹。升降護風燈。幕府容疎放。蠻天罷鬱蒸。南園多勝友。況挹酒如澠。羊城客舍同萬泰。嚴煒陳子升。醉始亭醉賦。

客舍所居堂。勝侶時相求。興來攜手一展眺。恍如孫楚之酒樓。樓頭取酒恣驩譔。遠勝十千宴平樂。海寺鐘聲風末聞。江城帆影樽前落。夕陽飄忽晴滿林。須臾急雨來庭陰。蠻天五月不知暑。座客相看寒已深。我本蘆中人。易下新亭淚。莫辭魯酒薄。拚作高陽醉。出亦復苦愁。入亦復苦愁。黃河之清不可俟。何用長懷千載憂。陳拾遺嚴夫子。羅浮四明兩道士。意氣寧從杯酒生。文章本是千秋事。況今生涯羈旅中。時危得不悲途窮。丈夫三十不自立。一身漂泊隨秋蓬。雖未白頭成老翁。當前有酒且痛飲。明朝歧路仍西東。

同陳五子升過光孝寺

浩劫虞翻宅。沙門大士居。寒煙萬井外。春樹六朝餘。是日風旛動。諸天夕照虛。更尋濠上樂。偶坐一觀魚。

越王臺懷古

君不見越山高高越臺古。複道逶迤接南武。北望山頭徧白雲。西臨城下環珠浦。由來形勝盡高丘。萬里天南此壯游。驚濤暗向扶胥落。佳氣晴連鬱水浮。憶昔中原逐秦鹿。五軍失利屠睢戮。番君一出王衡山。戶將從征入函谷。天教霸象開南溟。宵分東井聚五星。龍川縣令起嶺表。被書移檄馳邊庭。聲言三關盜兵至。一時按法誅秦吏。萬人旣築滇陽城。千里還開雒王地。漢帝當年爲剖符。陸生燕喜出西都。冠裳魁結須臾變。文錦蒲桃絕世無。番禺之交一都會。因山築臺落天外。百丈迴盤信壯觀。三時朔望長升拜。自古羈縻稱外藩。誰令市鐵禁關門。不見鮫魚重入貢。旋看黃屋自言尊。漢使陳觴更行樂。紫貝明犀雙孔雀。重來錦石已成山。歸去黃金遂盈囊。一從蒟醬啓唐蒙。越騎校尉甘泉中。是誰僂殺棄繻者。江淮巴蜀紛來攻。伏波下瀨軍三面。樓船戈船齊教戰。合浦珠崖隸海隅。山薑扶荔移深殿。尉佗城圯夕陽原。建德園荒秋樹根。虛傳避暑游宮闕。幾見浮杯出石門。木棉花開山雨積。鷓鴣啼處蠻煙碧。舊井潛移郭璞城。離宮半入虞翻宅。人事消沉洵可哀。千秋朝漢餘高臺。漢家遺蹟不可問。吁嗟乎。歌風柏梁安在哉。

東官書所見

浦樹重重暗。郊扉戶戶關。長年搖櫓至。少婦采珠還。金齒屐一尺。素馨花兩鬢。摸魚歌未闕。涼月出雲間。

東官客舍屈五過譚羅浮之勝時因道阻不得游悵然有懷作詩三首

枉作名山約。茲來不易逢。雨捎千徑竹。苔冷萬年松。錦鳥青丘下。霞書石室封。向來獨往地。惆悵闕仙蹤。
傳道朱明洞。堪留白石樵。鸞凰曾可御。蛇虎爲誰驕。細草香金澗。寒雲束鐵橋。梅花清夢斷。彼美罷相要。
勾漏來仙令。神靈得鮑姑。丹砂不死藥。竹葉辟兵符。白日飛蝙蝠。紅雲泣鷓鴣。何能振衣去。敢復計窮途。

過朱十夜話

番禺屈大均

黃木灣頭月。扶胥渡口舟。日方逾北至。火已漸西流。過雨收紅豆。連波狎白鷗。夫君若葭草。一見卽忘憂。

贈張山人穆

鐵橋山人逸興長。草堂卜築東溪傍。彈碁擊劍有奇術。飲酒賦詩多樂方。逢人豈憚霸陵尉。畫馬不數江都王。莫道雄心今老去。猶能結客少年場。

贈張五家珍

可歎張公子。流離自妙年。身孤百戰後。門掩萬山前。易下窮途淚。難耕負郭田。平陵松柏在。餘恨滿南天。

贈高巖

高生老畫師。往往賦新詩。能事繇來重。狂歌和者誰。飲知犀首好。情識虎頭癡。不向銅鞮去。尋常倒接羅。

哀莫處士以寅

濃花細雨落前簷。憶別江樓暮卷簾。今日天涯同調盡。白楊荒草哭陶潛。

食龍目

龍目原奇樹。嘉名自海區。何年賦旁挺。得與側生俱。黃擬支郎眼。圓分漢女珠。幾人曾嗜此。昌歎未應殊。

送曹方伯還里

惆悵紅亭酒。登艫奈別何。秋風空日夜。歧路渺關河。重以歸與歎。因之勞者歌。還憑長短笛。吹出感恩多。

夜泊西南驛

生煙平楚夕。隱隱見西南。獵火寒歸騎。津亭暗落帆。往來仍嶺外。憔悴卽江潭。縱有還家夢。愁多已不堪。

三水道中

浦樹高原盡。人家負郭稀。夕陽明斷塔。風色上征衣。老馬長途伏。飢鷹側翅飛。寒江日西下。不送北船歸。

崧臺晚眺

傑閣臨江試獨過。側身天地一悲歌。蒼梧風起愁雲暮。高峽晴開落照多。綠草炎洲巢翠羽。金鞭沙市走明駝。平蠻更憶常年事。諸將誰同馬伏波。

七星巖水月宮

晨策遵北渚。初瞰麗陽崖。淒清曾颺發。鬱述素雲霾。橫術越故蹊。交林冠高齋。蒼煙秀松果。白石崇基階。

以茲清曠地。結念澄中懷。瑤琴雖無音。山水調長諧。何必答獻歌。魚鳥卽朋儕。懷新意猶眷。撫往迹誠乖。卽事非浮歡。眞樂亮難偕。

入景福洞登璇璣臺

紺宇陟旣窮。靈域探未竭。援蘿巡傾崖。窺巖辨修碣。滅跡超重深。拂衣避律矧。入客驚坎習。出泉自蒙發。洩雲晴未歸。石火寒不伐。吹萬聆天風。明兩見日月。芳塵凝花堂。象緯逼金闕。陰澗待息心。陽阿足晞髮。歲晏當來游。毋令蕙草歇。

由香關至玉虛觀遂轉登絕頂

山行不辭勞。況非道路長。石門敞層阿。沙草敷陽岡。仄徑旣窈窕。連峰復青蒼。登高睎千里。矯首凌八荒。飛鳥遺之音。埃風吹我裳。覽彼終南詩。有紀亦有堂。亭亭翠旗列。宛宛朱鳳翔。忘憂豈在邇。爲樂誠多方。何當啓閭闔。高舉朝紫皇。

下扶嘯臺陟闔風崖自蓬壺徑汎舟入鐘鼓洞

高寒肆冥搜。幽異愜心賞。窮梯背樵蘇。密徑面篠蕩。睇後路旣迴。瞻前渚彌枉。緬辭蘇門嘯。重作剡溪訪。泉石匪自今。亭臺已成曩。其鏗異短聞。無射中奇響。偉茲造化功。流形信无妄。津逮興故超。神淵道斯廣。懷哉謝人寰。歸與授吾黨。

阻風珠江口漫成十韻

疾風江上起。舟楫盡停橈。靜聽千林折。驚傳百丈囂。飛鳴連雁落。高下斷蓬飄。急鼓峒人伐。殘虹颺母驕。土囊愁岌嶮。板屋歎漂搖。望入孤城近。真成一水遙。空倉寒聚雀。深樹晝聞鴞。長短誰家笛。東西背郭樵。驅馳嗟異域。搖落感今朝。惆悵王孫路。懷歸不自聊。

送嚴煒之惠陽

相期且樂酒。相見輒悲歌。相送有如此。相思知若何。晴川疎樹遠。落日亂山多。別後豐湖月。聞鐘應獨過。

鬱洲寒望

一丘迴枉渚。獨往失斜曛。到地無南雪。連天有朔雲。貪泉懷刺史。蠻語問參軍。漸聽寒潮落。昏鐘隔浦聞。

曝書亭集卷第四

古今詩三

著雍閣茂

將歸留別粵中知己

請君膝上琴。彈我游子吟。哀絃激危柱。離思難爲音。賓御皆煩紆。何況居者心。于役既有年。歸哉方自今。不辭路悠長。眷此朋盍簪。山川一以隔。邈若商與參。行邁日靡靡。憂心亦欽欽。汎舟滄浪天。驅車遏雲岑。中誠何用寫。執手情靡任。

峽山飛來寺

花宮蕭瑟暮雲間。絕磴藤蘿迥莫攀。一自高風留帝子。至今修竹滿空山。澄潭犀去沉金鎖。古洞猿歸帶玉環。此夕登艫渾不寐。更教沿月弄潺湲。

凌江道中

遠客千行淚。離程一葉舟。生憎江上水。不肯向東流。

楊歷巖觀瀑布水

古今詩三

瞻塗越修畛。遵渚拂芸若。駕言陶嘉月。采隱滌氛翳。舍車循曲汜。捫葛升陵喬。柔荑挺英蕊。灌木蔚豐條。仰沾潺湲沫。俯聆載道飄。逝者如斯夫。洊至非崇朝。靜觀羣化遷。始悟萬象超。一鼓丘中琴。清響流山椒。鳴鳥聲相求。潛蚪德彌劬。願言繫白駒。於焉久逍遙。

雄州歌四首

雄州滿目瘴雲羃。風物當年亦可懷。大庾梅花連小庾。正階流水入斜階。綠榕萬樹鷓鴣天。水市山橋阿那邊。蜚雨蠻煙空日夜。南來車馬北來船。滇江西下墨江流。來鴈孤亭春復秋。十部梨園歌吹盡。行人虛說小揚州。山頭風急雨淒淒。篔竹荒茅一望迷。縱有歸人歸未得。空勞夜夜子規啼。

席上留別陸兄世楷

但秉中宵燭。重爲旅客吟。驪駒卽長道。絲竹本哀音。越嶠停雲遠。秦關落日陰。無勞岐路別。酒坐已霑襟。不隨野雀棲。不挹斜階流。顧茲非我鄉。胡然久滯留。侵星陟長阜。亭午次崇丘。九丸青松偃。鬱鬱玄雲浮。有滄自東來。畢景忽西遄。征夫念獨宿。徒御方相尤。

庾嶺三首

相尤夫何爲。獨宿在車下。往矣歲聿除。來思月惟夏。大儀互迴游。芳華雨徂謝。迴車感長途。如歲匪遙夜。

我馬旣已瘖。征夫本靡暇。曰旦候雞鳴。嚴程起夙駕。
夙駕踰秦嶺。連岡勢逶迤。一爲愁霖唱。慨彼東山詩。沾我征衣裳。素絲以爲縑。不愁裳衣濕。所嗟徙御飢。
薄寒忽中人。不異三秋期。言旋雖云樂。翻使我心悲。

謁張曲江祠

峻坂盤神樹。陰崖鑿鬼工。芳塵羽扇冷。春燕玉堂空。不覩關門險。誰開造化功。經過遺像肅。千載嶺雲東。

晚過東山寺

飛閣流丹蝕。層巒積翠多。松間明月在。惆悵下山歌。

題南昌鐵柱觀

丹臺縹緲麗層城。鐵柱縱橫鍊紫清。陰洞蛟龍晴有氣。虛堂神鬼晝無聲。游人自愛登高賦。仙吏仍兼濟物情。雷雨忽愁天外至。江湖元在地中行。

登滕王閣

峻閣峙洪都。凌虛落照孤。縈迴窮島嶼。波浪接荆吳。舊地君王賞。分封禮數殊。霓旌千騎入。玉佩幾行趨。
水汎魚龍宅。花濃蛺蝶圖。星霜歌舞換。俯仰物華徂。躋以三王重。名將百代俱。雄文思往事。高興亦吾徒。
闌檻看如昨。登臨信可娛。西山開積雨。南浦散平蕪。作賦秦公子。行吟楚大夫。由來憑眺地。襟帶有江湖。

阻風吳城

客路愁何極。清樽幸未空。匡廬長在望。不厭石尤風。

舟次彭澤悼萬孝廉

涕淚千秋在。田園萬事非。悲風彭澤柳。宿草首陽薇。但有青蠅弔。虛傳白鶴歸。秣陵書不遠。何處觀音徽。

秋浦

秋浦沙寒鷺浴。敬亭山暝雲流。何處吹來片雨。回風正濕鄰舟。

烏江謁西楚霸王廟

山前松柏憤王宮。遺恨當年尙不窮。忽見諸軍盡垓下。愁聽父老說江東。美人罷舞餘春草。駿馬悲鳴自朔風。萬歲來游還此地。千秋霸業有誰同。

還家卽事四首

回首辭江海。驚心念物華。漸看鄉樹近。彌覺旅程賒。避地虛留井。無田學種瓜。重爲廡下客。慙媿說還家。遠客朱顏改。高堂白髮新。長貧謀半菽。幾日且兼珍。遂有耕田計。無勞陟帖頻。南陔蘭可采。眷戀及良辰。卜築仍無地。來歸轉自憐。癡兒猶昨日。病婦已連年。扇有蒲葵攬。牀移莞莢眠。濁醪供取醉。不向酒壚前。至此猶餘悸。於焉暫息機。不辭新蠟屐。重理舊鶉衣。鬼笑劉龍拙。車看袁紹非。生還良已幸。長缺幾人歸。

有感介人
履安也。

雨中陳三島過偕飲酒樓兼示徐晟

吳門十日風雨惡。決明花開忽復落。游人登高愁未已。客子入門慘不樂。陳生疎放良可喜。雨中過我臨頓里。却話平生同調人。吹簾擊筑皆知已。皋橋橋西多酒樓。妖姬十五樓上頭。百錢一斗飲未足。半醉典我青羔裘。坐中臨觴忽不語。南州孺子高陽侶。同是東西南北人。明朝酒盡歸何處。

吳江顧處士樵扁舟過訪留所畫山水圖并新詩見贈集杜句酬之

君不見東吳顧文學。前者途中一相見。同心不減骨肉親。素知賤子甘貧賤。故國平居有所思。數篇今見古人詩。飄零已是滄浪客。酒後嘗稱老畫師。畫師不是無心學。合沓高名動寥廓。漫勞車馬駐江干。數問舟航留製作。春山無伴獨相求。請君一來開我愁。乘興遣畫滄洲趣。舟楫渺然從此去。乃知變化不可窮。意匠慘澹經營中。陰崖却承霜雪榦。山木盡亞洪濤風。尤工遠勢古莫比。雲白山青萬餘里。虛無只少對瀟湘。天下何曾有山水。浴鳧飛鷺晚悠悠。琴瑟几杖柴門幽。嗚呼。何時眼前突兀見此屋。獨立縹緲之飛樓。

屠維大淵獻

喜羅浮屈五過訪

春風蝴蝶飛。綠草南園遍。知是麻姑五色裙。羅浮山下曾相見。開門一笑逢故人。遠來問我桃花津。若非綠玉杖。定跨黃麒麟。不然出入京雒一萬里。何爲布素無緇塵。相知樂莫樂。不用金箱圖五岳。況今天地多戰爭。赤城華頂風煙驚。山陰道士不得見。四明狂客誰相迎。由拳城南春可惜。竹石如山水千尺。從此扁舟范蠡湖。長歌來往裴休宅。

贈顏鼎受

桐鄉顏氏子。才大最能詩。往作青齊客。論交游俠兒。星流赭白馬。日射黃金羈。不惜歸來困。簞瓢樂可知。

送王援入蜀省其尊人觀察庭

向晚東城下。驪歌不可聽。寧親遠行邁。送客出郊坰。去馬黃金絡。離筵碧玉餅。山花開古驛。河柳遍長亭。絕域春零雨。浮槎夜挂星。連天秦棧樹。如日楚江萍。已見投三峽。曾傳役五丁。飛雲橫太白。丹嶂落空青。蜀道難如此。瞿塘險未經。猿聲流暗壑。鳥路入晴冥。好醉臨邛酒。重題劍閣銘。還憑梁上月。夢想對儀形。

渡錢塘

渡口乘潮漾。北風輕舟如馬泝。江東明朝又是山陰道。身在千巖萬壑中。

贈蔡五十一仲光

十里湘湖水。迴流入女牆。君家湖水上。時有落花香。海月生江寺。風琴響石堂。更聞多古調。識曲漢中郎。

梅市飲祁四居士駿佳宅同徐十五祁六分韻

舊里仙人市。搖峰玉女巖。牕中交浦樹。檻外落風帆。藥圃穿籬遠。沙泉近海鹹。紺園留過客。黃獨斲長錢。楊下同徐穉。林中對阮咸。坐來殘暑退。涼思入楓杉。

題祁六班孫東書草堂

愛汝谿堂靜。開尊乍卷帷。江花平岸發。山鳥過庭飛。東海賦垂釣。西山懷采薇。一爲歌白雪。高調和應稀。

祁六坐上逢沈五

沈五配祁夫
人湘君善詩

東陽年少沈休文。五載相思兩地分。今日謝家羣從在。青綾障外更逢君。

祁理孫席上口占

公子華筵醉幾迴。玉簫金管夜重催。他鄉信美不歸去。一飲須傾一百杯。

祁六紫芝軒席上留別

長路何年別。幽居此地偏。石林芝草秀。蘭澤荷花鮮。上客且安坐。主人猶未眠。不知高館裏。絲竹是離筵。

顯皇帝大閱圖爲吳金吾國輔賦并序

萬曆初。太師張文忠公居正秉國。勸駕大閱。時兵部尙書吳公兌實典禁旅。俾圖以傳子孫。錦衣都督同知國輔尙書曾孫也。出以觀客。圖長三丈餘。內自宮闕。外至陵寢。極于沙漠。止焉。繇是萊陽宋琬作賦。南

昌王猷定作記。而彝尊作詩以述之。

神廟垂衣日。江陵總百官。揆文先奮武。慮亂本居安。殿上蕭何履。朝中貢禹冠。孫通明禮樂。方叔莅師干。駕馭英雄在。超騰士馬驩。車徒看翼翼。禁旅尙桓桓。畫史真能事。披圖得鉅觀。丹青榮顧愷。宮室擬胡寬。歷歷開城闕。高高疊井幹。虛無凌倒影。縹緲結重巒。太液波還靜。長楊露未乾。妝樓原自鏤。圓殿不禁寒。仙杖移平樂。霓旌擁上蘭。忽驚千騎並。旋訝六營團。作氣陳金鼓。前驅建玉鑾。輕雲承翠蓋。麗日表朱竿。遂列堂堂陣。爰升將將壇。小侯班四姓。大閱用三單。紫燕雙絲絡。花驄七寶鞍。呈能羣角觝。教射集星弁。觴飲籌無算。饒歌曲漸闌。行知塵冉冉。歸想佩珊珊。遠勢工尤極。平原繪更難。蕭疎連板屋。迢遞出峰巒。百里生毫末。諸陵望鬱盤。薊門無堠火。函谷有泥丸。元老謀猶壯。諸孫手澤完。錦題探篋笥。湘簟展琅玕。對此成希覲。因之感萬端。雨煙飛蜀錦。霜雪皎齊紈。賦愧王延壽。謠同梁伯鸞。儀章長在目。珍重歲時看。

飲吳生理楨宅

吳郎愛客解千齡。勸飲青絲挈玉餅。落日兒童齊拍手。過江三日幾曾醒。

食鮓魚

白小休論小。奇珍信可珍。炎天來積雪。入饌總如銀。稻蟹時方早。蓴鱸思莫頻。不知江海上。幾處罷垂綸。

越江詞

山圍江郭水平沙。過雨輕舟泛若邪。一自西施采蓮後。越中生女盡如花。

題越江詞後

上虞錢霍

翩翩公子剡川游。五月山陰鏡裏舟。自向花前歌妙曲。若邪溪女盡風流。

曹娥廟觀渡二首

問渡要津吏。沿流信楫師。江空鳴社鼓。風細颯靈旗。遂入曹娥廟。同觀漢代碑。浮江千載恨。猶有弄潮兒。
小小邪溪女。潛來事禱祈。罷歌河女坐。不上越航歸。晉書夏統傳曹娥沉後國人哀其孝義爲歌河女之章斜日明金闕。涼風到錦幃。還持白團扇。搖動五銖衣。

土城山和錢六

江花江草滿江關。浣女清歌日暮還。曲罷彩雲猶未散。春風吹上土城山。

原作

上虞錢霍

西施明豔世間希。此地曾經換舞衣。春色不隨流水盡。暮山猶見彩雲飛。

雜詩三首

滔滔東流水。中有西上魚。素鬢揚洪濤。騰決勢有餘。雲霧生晦冥。川岳助吹噓。白龍未變服。胡然愁豫且。亮無圖南志。終返北溟居。

鷓鴣本大鳥。海處揚波濤。何意天風來。吹之入魯郊。鏘鏘鐘鼓鳴。昂首思扶搖。青雲鍛其翮。烈風焚其巢。先時方笑言。後至斯號咷。

騏驥服鹽車。羶猴騎土牛。於心徒欲速。爲計苦不周。白洋旣覆粟。太行亦傾輈。擇術昧先幾。焉能獲所求。

寄屈五金陵

新從白蓮社。舊事紫陽君。貽我羣仙詠。全勝十賚文。風濤楊子渡。松柏蔣陵雲。共有山棲志。題書報爾聞。

同作

嘉興周箕青士

昭景元名族。宗雷愛道流。聞依靈谷住。最近孝陵秋。倚閣三松樹。風香閣存陵樹三株浮江一葉舟。匡山多勝侶。何日虎谿游。

又

秀水徐善敬可

傳說靈均裔。經秋尙未還。卜居那有地。縹馬定何山。五岳朝羣帝。孤舟下百蠻。遂令哀郢曲。流轉到人間。

又

秀水朱彝鑒千里

三閭文采後。之子繼清標。少日矜奇服。空門賦大招。軍容屯朔騎。風物話南朝。庾信傷心地。江關入望遙。

八月十五夜集半邇錢爾復齋有懷錢汝霖錢四本姓何

舊識何顛宅嘉興李繩遠斯年溪亭雜樹交。秋花低結子嘉興李符分。寒竹暗抽梢。樓下南州榻嘉興李良年武。
曾彌漸左顧庖。山餅攜播酒海鹽錢爾復子湘。野蕨出杭肴。樂飲傾三爵嘉興李符分。賓筵賦載嘏。風
多沉北斗。繩遠雲密自西郊。肅肅離鴻下嘉興李符分。栖栖獨鶴巢。空堂驚蟋蟀良年。涼牖落蠨蛸。待月虛高詠。
爾復停杯試解嘲。小山棲隱處。符悵望隔衡茅繩遠。

過筏公西谿精舍懷羅浮屈五留白下

爲愛精廬好。海寧朱一是。近修還從勝侶探嘉興屠燠閻伯連。山藏礪戶屠燠。昭仲百頃漾風潭嘉興李。
鏡明遠。暇日同看竹嘉興周質青士。終朝罷采藍嘉興繆永謀。天自汀洲縈曲岸嘉興鄭珮。隨始空翠入
層嵐嘉興沈進山子。靜聽蓮花漏嘉興幽尋燕子龕。李繩遠林泉訪支遁李良年。晨夕過劉惔李符。慧業
知相似。一是玄言試共參。爇香雲浮貝葉。燁松火照金函。鏡坐起頻移榻貧。遲留此盍簪永謀。漫須觀露
權。珮且與薦霜柑。進高興雖云洽嘉興離懷總不堪。繩遠同心方遠道良年。輟權復停驂符澤。畔吟應數
一是淹中臥未甘。爇飄零曾薊北。燁棲泊又江南。鏡亦羽紛傳檄貧。青鞵孰荷擔永謀。石城秋草積珮。瓜
步夕陽含。進佳訊憑誰寄嘉興。端居祇自慙。繩遠西飛有孤鶴良年。天末望蘇耽符。

懷嚴煒客嶺南

老去嚴夫子。辭家久不回。升沉安可問。時命轉堪哀。尙有高堂在。曾無驛使來。遙憐望鄉處。日上越王臺。

同曹侍郎遙和王司理士禴秋柳之作

回首秦川落照殘。西風遠影對幘旰。城頭霜月從今白。笛裏關山祇自寒。亡國尙憐吳苑在。行人只向灞陵看。春來已是傷心樹。猶記青青送玉鞍。

同賦

橋李曹溶

灞陵原上百花殘。隄樹無枝感萬端。攀折竟隨賓御盡。蕭疎轉覺道途寒。月斜樓角藏烏起。霜落河橋駐馬看。正值使臣歸去日。西風別酒望長安。

初秋泊錢清江

錢清江口水平堤。雲木參覃磴不齊。川靜未聞鴻雁度。雨昏時有鷓鴣啼。逃名梅尉來吳市。避地梁生入會稽。枉自含情臨北渚。秋風嫋嫋草萋萋。

飲張司理陞南華館題壁

南園載酒勸君歌。涼月紛紛照薜蘿。鏡水連天八百里。張星依舊在明河。

梅市對雨遲朱士稚不至同呂師濂祁理孫班孫分韻得泥字

溪亭蕭瑟水雲低。積雨千山極望迷。落葉漸看沙徑滿。寒烏偏傍女牆啼。重來賓客仍羈旅。此去鄉關亦

鼓鼙何事懷人坐。惆悵且拚今日醉如泥。

留別董三

離堂翦燭重燒燭。深夜他鄉說故鄉。作客蕭條官舍下。逢君歌哭酒壚傍。明朝分手仍南北。後會相期各渺茫。長路烽煙驚海甸。亂山風雨暗河梁。

上章困敦

同杜潛俞汝言屈大均三處士放鶴洲探梅分韻

徑轉叢篁曲。谿迴石磴斜。爲園傳故相。唐相裴休別業勝事復吾家。晚日吹山雨。陰雲覆浦沙。春風三百樹。猶有未開花。

送汪進士挺游嶺南

獻歲發吳閫。緣流抵建康。北風吹五兩。幾日上潯陽。榕葉山城暗。梅花驛路長。回思舊游地。飛夢到君傍。

和曹使君憶姚州酒歌二首

姚州白酒白於泉。醉客何論三百錢。十月糟牀初滿注。莫教焚却子猷船。曹娥江口晚潮低。兩槳春船入會稽。最憶黃冠敲倒日。夕陽山色鑑湖西。

聞東莞查明府舅培繼擢戶部書寄

飛來雙燕子。遠自羅浮山。爲報神明宰。青春萬里還。風煙辭粵嶠。車馬下秦關。從此相思夢。無煩到百蠻。

寄顧處士有孝

東吳顧文學。念爾亦窮途。留客還雞黍。傾心及釣屠。江城三歲別。書札一行無。何日能相訪。扁舟范蠡湖。

杜別潛

石城烽火後。孤客轉浮沉。乞食來吳市。爲園失漢陽。襄陽耆舊傳。荆楚歲時心。還復扁舟去。淒其洛下吟。

同魏周二處士集鍾淵映宅遲俞汝言不至

城隅急雨漲溪沙。酒坐銅盤燭影斜。有約南樓懷謝監。起看江水落江花。

附簡朱十

秀水項奎東井

昨日南樓讌。懷人到燭斜。風前吟未足。江水落江花。

寇至二首

百里寒山下。萑苻遠近齊。探丸分赤白。放溜各東西。都尉金爭摸。蚩尤霧忽迷。今宵聞野哭。應有萬行啼。我友遭維繫。空留舊竹林。徒聞鞭寧越。猶未釋陳琳。黃犢誠難賣。青氈詎可尋。垂堂原有誠。端不爲千金。

里中王秀才。訪爲寇執至。營中家貧無金可贖。遭害。

五十白頭翁。經書滿腹中。畏人成小築。把釣待秋風。黃卷真如律。清樽幸不空。看君多道氣。恥與萬人同。

寄表弟查容

查容倜儻無與儔。頻年題詩黃鶴樓。一朝攜家忽西下。挂席遠返荆門舟。平生與子未相識。相逢意氣何相投。往時寒食一百五。鬪雞要我東城遊。東城春寒吹細雨。留我南軒長夜語。坐中陳光祿。吳統持十數公。一時傾倒相矜許。呼僮將炙襄陽兒。喚婢監廚大堤女。盤中尙進武昌魚。甕頭更出宜城醪。別來幾月不相聞。聞道新詩更軼羣。九日登高還落帽。三秋對酒定論文。由拳城西白日短。寒風淒淒雪纂纂。舟楫傳君數往來。音書未得通情款。妻子猶從廡下居。朋簪尙遺堂中滿。年來我亦善留賓。千金散盡空一身。不知生產緣何事。仍復饑寒傍路人。只今交道非疇昔。論心那得同金石。空手徒令壯士慚。因人遠道非長策。勸君有錢須愛惜。楊朱岐路見不悲。阮籍窮途慟何益。

屈五來自白下期作山陰之游

楚調聞高唱。吳航下舊京。涼秋八九月。招我固陵城。射的仙人去。籠鵝道士迎。明湖凡幾曲。攜手鏡中行。

同作

番禺屈大均

最恨秦淮柳。長條復短條。西風吹落葉。一夜別南朝。范蠡湖邊客。相將蕩畫橈。言尋大禹穴。直渡浙江潮。

送屠曠重入閩

閩嶠曾游地。仙歌聽未終。花源凡幾曲。身入幔亭中。

梅市逢魏璧

前年逢君射襄城。山樓置酒懽平生。淳于一石飲未醉。孟公四坐人皆驚。今年逢君梅福市。潦倒鹿疎已無比。寒暑推移六七年。眼前貧賤猶如此。悲君失意成老翁。況復奔走隨西東。攬鏡不知頭盡白。逢人先說耳初聾。山陰祁生賢地主。好奇往往相傾許。豈無上客朱用調。與姜廷梧齊向高堂飯雞黍。哀絲急管何其多。酒酣坐起舞婆娑。魏生魏生奈爾何。百年強半成蹉跎。天生汝才豈牖下。何爲抱膝徒悲歌。

柯山

柯亭山下路。修竹暮紛紛。衆壑千尋暗。雙崖一徑分。沙光明草樹。日氣冷江雲。更憶中郎笛。寥寥不可聞。

送錢六霍朱大士曾同游白下

高詠方從月下聞。佳書猶未換鵝羣。一朝並馬金陵去。閒殺羊欣白練裙。

同王二猷定登種山懷古招屈五大均

翠磴盤雲外。蒼山出水隈。樓從飛翼上。峯引臥龍迴。相宅先謀士。成功倚霸才。扁舟一以去。高鳥至今哀。授命誰能爾。知幾不易哉。古碑猶宿草。春殿幾寒灰。流覽窮高下。川涂足溯洄。車書王會地。雲物怪游臺。鄉路迷吳苑。賓朋得楚材。清言同謝許。妙道解宗雷。不分征衣薄。寧愁落日催。成連能就我。急爲抱琴來。

雪中得內人信

河橋風雪斷歸航。遠信沉吟祇自傷。不道比來相憶苦。虛煩錦字十三行。

古意二首

涼秋八月游子當遠行。寫心未及竟。轅馬顧我鳴。我車駕君馬。我馬駕君車。徘徊四野中。執手且斯須。何用問遺君。約指于闐玉。上有龍子蟠。下有鴛鴦宿。繚以五色絲。青紅與碧綠。願君一分手。思我贈君時。潛淵與皎日。信誓終不移。

嚴冬十二月。飛來雙白鷗。錦字盤中詩。中央周四角。君書我當報。我書君當開。徘徊一室中。庶以喻中懷。何用問遺君。却月裁胷前。縫以七孔鍼。著以同功絲。青紅與碧綠。五色絲相連。願君一置腹。思我寄君情。轆轤與車轂。輾轉何時平。

寓山訪屈五

草綠南園積雨餘。溪橋宛轉石門虛。山頭白鶴遙相待。知有仙人射的居。

同宋使君琬游雲門山

頻年客會稽。愛茲山水幽。咫尺雲門寺。經旬不出游。朝霞開霽色。喜見風雨收。使君高興發。要我登輕舟。輕舟出遙汀。人語答清冷。流連石帆下。遂至樵風涇。北船吹以南。南船吹以北。欲問仙人居。迢迢不可得。

仙人張射侯。乃在雲中弋。一鶴西飛來。拾矢清谿側。鶴飛猶在沙。回流泛若邪。可憐誰家女。顏色如荷花。新妝映碧水。一笑浣溪紗。如雲匪我思。但弄邪溪月。裊裊綠蘿煙。照見清輝發。際曉衝薄寒。更衣度林樾。鬱金蘭陵酒。酌以鷓鴣杯。一飲動一石。不覺玉山頽。扶我上馬行。有似乘船迴。便蠟阮孚屐。來登任公臺。昔賢多奇懷。眷此滄洲釣。至今臺下泉。清風滿雲嶠。蕭蕭翠竹陰。隱隱哀猿嘯。猿嘯溪風生。動影搖空明。時從翠微半。一聽鐘鼓鳴。鐘聲來何遲。及此夕陽時。山尋子敬宅。塔訪辨才基。明當凌絕頂。更讀秦皇碑。

山陰送葉六變還當湖

畫舸乘風一葉輕。紅亭相送客相迎。最憐小史如初日。不勸離筵到五更。

山陰客舍送高舍人還膠州

公子翩翩狐白裘。向予長揖返膠州。西陵松柏闔門柳。繫馬春風何處樓。

送蔣翰林超歸金壇

自聽驪駒唱。彌令客思牽。相逢纔破月。惜別已殘年。紅葉山中屐。翰林游雲門賦紅葉詩三十首金沙渡口船。遙憑千里

夢。飛度玉堂邊。

萬歲通天帖歌贈王舍人作霖

千金購墨妙。摹自萬歲通天年。自從靖康亂。人間始覩真蹟傳。百年以來藏項氏。年時記得曾開視。雖無

烏衣四七人。尙有金輪十三字。若非薛稷鍾紹京。安能蓮腕如天成。銀鈎蠶尾細豪髮。懸針垂露紛縱橫。表上中書勅開宴。九賓咸列武成殿。題扇書裙恍再逢。看朱成碧誰能辨。由來神物難久留。昨日之日忽我逾。留題已入他人室。想像空深異代愁。王郎生長山陰縣。弱年通籍金閨彥。贈我盈盈尺素書。君家勝蹟重相見。出門瀕洞風塵多。願置懷中字不磨。試將射的仙人鶴。籠作山陰道士鸞。

曝書亭集卷第五

古今詩四

重光赤奮若

元日對雪簡宋孝廉實頤

令節他鄉會。春盤上客偏。亂雲迷禹穴。獨鶴語堯年。坐下山陰雪。無愁射的玄。明朝江口望。定有孝廉船。

上元南鎮逢蕭鍊師

夏后藏書日。時巡到海陬。周王經野地。作鎮表揚州。秩祀由來重。神功未易酬。河山維十道。封爵視諸侯。碧瓦雲旗繞。香煙石鼎浮。笙簫陳里社。巫覡醉春秋。勝序羣賢至。先生靜者流。真形圖五岳。遐想結三洲。絳縣年須數。黃庭義可求。終期御風去。長袖挹浮丘。

伎席贈王二

松樓竹館映清輝。半醉重窺玉女扉。我欲傳杯杯不放。落花如雪滿春衣。

山陰雨霽同楊大春華游郊外飲朱廿二士稚墓下

簞醪河邊閒杖藜。道逢酒伴相招攜。醉向南鄰抱被宿。際曉不聽天雞啼。醒來忽驚海日出。披衣卻步無

東西殘流。小草水決決。舍南舍北。猶春泥揚雲不曉事。要我登會稽。香爐乍見紫煙起。石簣尙有陰雲低。坐我石橋上。影落橋下溪。笑看屐齒折。未得凌丹梯。敝車羸馬寒食下。感念同游淚盈把。新鬼今從故鬼鄰。百年誰是長年者。我今持杯一勸君。有酒且對劉伶墳。從教浣女溪頭曲。并入山陽笛裏聞。

侯山讌集

山係晉孔愉所居

侯山山上放龜臺。百尺紅亭鏡裏開。試向花源齊列坐。何如蘭渚遠浮杯。巡檐浦樹迎人出。卷幔洲禽拂席迴。我欲臨風歌一曲。起行松月重徘徊。

蘭亭行贈朱大士曾

右軍三十三。修禊蘭亭中。一書蘭亭序。天矯宛若天門龍。我今生年與之同。秋蛇春蚓百不工。竭來山陰道。柳青桃復紅。車如雞栖馬如狗。空使林泉落吾手。朝來蠟屐思入山。雨急風顛重回首。吾宗額也書絕倫。頻過論書仍論文。臨池就我一題扇。世上俗學徒紛紛。持觴勸君且傾倒。晴日今年去年少。曲水東流不待人。春風吹徧蘭亭草。

梅市訪祁七明府熊佳留贈公子誠孫因憶亡友朱廿二士稚

出郭試尋梅福市。臨流不減仲長園。白花結實垂垂綻。紅藥當階故故翻。公子風流能愛客。君家兄弟數開樽。重憐舊日同游少。腸斷空山聽曉猿。

山陰苦雨酬謝處士孔淵

半見天公笑。何時后土乾。游人三月罷。煙樹六陵攢。苦雨同張協。佳書報謝安。濠梁有高興。春水更宜看。

與朱二十九驥元約過楊大春華三江村居

獨樹原頭盡。三江牖口深。聞君理舟楫。許我共招尋。美醞千花露。生魚一寸鍼。鼉峰如可望。試作水仙吟。

贈祁七數

曹娥江上草初齊。謝傅堂前日未西。碧樹紅泉應有待。春來絲竹正堪攜。

贈沈華

沈生好畫兼好詩。昨朝和我春游詞。臨風一曲歌未已。惱殺城南輕薄兒。城南游女明珠佩。青翰舟中時並載。生也經營意匠新。纖纖貌出當風帶。明眸皓腕倚芳叢。修短穠纖思不同。飛燕忽教辭漢殿。西施不見入吳宮。尤長花鳥工沒骨。染草縈沙細如髮。蝴蝶麻姑五色裙。蟠桃漢帝千年核。新製齊紈更可憐。明朝催送下江船。煩君畫作相思樹。出入懷中敢棄捐。

彭山卽事

誰家三婦豔新妝。靜鎖葳蕤春日長。一出浣紗行石上。飛來無數紫鴛鴦。

重經彭山

猶憶清江舊板橋。門前曲水細通潮。垂楊不是傷心樹。那得長條更短條。

南鎮春游詞

黃衫白帽染緇塵。惆悵花時已暮春。總向越王城下住。扁舟須負五湖人。

同作

蕭山毛奇齡

春船初發白蘋開。十里橫塘晚未回。南鎮祠前北風起。夏王陵上雨飛來。

酬毛十九奇齡兼寄張五杉

逝矣三春日。蕭然百尺巖。知君南浦上。朝夕望征帆。湖水蓴絲熟。櫻桃馭鳥銜。歸期今已近。好遣報張杉。

偕曹侍郎潛施學使閩章徐秀才臧姜處士廷梧張處士杉郝公子理孫班孫段橋玩月分韻得

三字

漠漠孤雲合。蒼蒼半嶺含。江山攜謝朓。風月助劉惔。臥柳維舟數。驚烏繞樹三。還同牛渚夜。高詠信無慙。

同王處士猷定施學使閩章陸處士圻汎舟西湖遇雨

東風吹落日。西下北高峰。欲往南屏路。中流聽梵鐘。迴船沙岸火。驟雨石門松。不覺碧雲暮。涼煙生幾重。

觀海行贈施學使閩章

吾生空好游。五岳未登一。玉女青童笑向人。問君婚嫁何時畢。竭來四月西湖邊。興盡卻返山陰船。餘杭

春酒亦不惡。醉來只向壚頭眠。宛陵施夫子。貽我觀海篇。吳歛會吟不足聽。高張齊瑟絙朱絃。我歌且謠未終曲。風雨秦松振崖谷。天雞叫罷搏桑枝。羣飛海水搖空綠。東臨傑閣觀蓬萊。瀛洲草暖浮煙開。丹田玉闕了可觀。空中照耀金銀臺。齊三士魯兩生。由來此地才華盛。我欲從公問姓名。更尋徐市尋仙去。親向蓬萊采藥行。

曹侍郎席上送別顧工部大申還華亭鄒進士祗謨還晉陵

二子將有入都之役。

古寺登高盡。平湖向晚晴。琴書方燕息。車騎更逢迎。置酒從曹植。同游倦馬卿。壺觴無算爵。絲竹漸飛聲。近地多佳客。中筵忽送行。蒼茫浮水國。迢遞計王程。顧愷名元重。鄒陽賦莫輕。曳裾當日異。畫壁一時傾。皎月衣裳好。微風羽扇清。潮迴黃歇浦。江入呂蒙城。聞有南征士。橫行北府兵。時有兵警。河橋分手處。前路若爲情。

西湖竹枝詞六首

西子湖平鏡面揩。雷峰倒影象金釵。雲鬢妝就石新婦。香草爲裙筍作鞵。山到娑留城下平。橋從慶忌塔前橫。郎家側近水仙廟。可識水仙王姓名。西曲誰家窈窕娘。獨開小店松毛場。何年偷得江陵樣。織就女兒黃竹箱。岳王祠外舞臺偏。半在湖塘半在田。怕值油車蘇小小。勸郎騎馬不如船。

養魚莊說養魚肥。放鶴亭看放鶴歸。妾在鳳凰山下住。生來不見鳳凰飛。
湖面蕁絲寸寸長。爲郎情好作羹湯。朝雲吹散峰頭雨。日出團團雞子黃。

同作

秀水朱彝鑿千里

段家橋邊湖日陰。石新婦下湖水深。自從蘇小西陵去。松柏青青直到今。

于忠肅公祠

昔在狼山下。軍書犯近坳。六師輕朔漠。萬騎失雷霆。土木塵長滿。龍蛇歲不寧。豆田沙浩浩。黍谷路冥冥。
濟世須元老。長材總四溟。從容持國計。指顧悉兵形。瑕呂安羣議。劉琨表外廷。嗣王仍曆數。高廟有神靈。
旣罷金繒款。無煩白馬刑。北轅旋翠輦。南內啓朱扃。命已甘刀鑊。功真溢鼎銘。春秋隆代祀。俎豆肅維馨。
一自輶車至。難期堠火停。遺墟愁戰伐。大樹日飄零。碧草空祠長。黃鸝過客聽。霜鐘沉曉月。風牖繞明星。
卞壺誰修墓。巫陽數降庭。讖還思雨帝。碑欲墮江亭。遠水澄湖碧。流雲暗壑青。千年華表鶴。哀怨此重經。

徐吏部旭齡招飲西湖迴舟卽事

吳姬纖手抱雲和。花下迴船燭下歌。此夕緣流思並載。愁人無那月明多。

施學使問章招集湖舫

朝騎青驄馬。搖鞭似飛燕。道逢尺一書。要我出芳甸。是時孟夏初。澹蕩南風遍。天公忽大笑。向下生雷電。

吾黨三五人。類古之狂狷。脫我尋山屐。登艫接高宴。作使平頭奴。行廚具豐膳。雙絲白玉餅。勸飲嘉魴薦。向暝更移舟。浮嵐夜頻變。平湖靜無波。皎如一疋練。悅忽葑田中。明滅金牛見。左持鸚鵡杯。右把琉璃研。一笑問主人。何似宣城縣。試畫敬亭雲。貽予白團扇。

由淨慈寺登南屏山絕頂晚憩壑菴精舍

南山色蒼翠。宛若屏風張。下視湖水深。十里浮清光。是時溪雨止。霽色開秋陽。吳娃蕩兩槳。送客上方塘。靜聽煙寺鐘。忽落翠微傍。綠蘿挂絕壁。紫葛懸層岡。層岡何盤盤。松林蔭巖日。公等皆好游。我意雅相匹。入洞窺乳泉。登崖采蜂蜜。失道蒼耳中。蒙茸久方出。出谷齊下山。遂叩中林關。山僧顧我笑。拍手磐石間。簷前桂樹白。鏡裏荷花殷。攀荷坐更遲。拂石影相並。愛此精舍閒。留連日將暝。日暝未足愁。浮雲蔽崇丘。雷聲驚客聽。急櫂迴孤舟。

吳山望浙江

一峰高出萬松寒。磴道虛疑十八盤。近海魚龍吹宿霧。中天日月轉浮瀾。風帆岸壓明珠舶。仙樹花濃白石壇。舊是錦衣行樂地。江山眞作霸圖看。

湖上贈蘭陵陳生

西冷橋下水。清擬惠山流。笑問蘭陵客。能來釀酒不。

寒夜集燈公房聽韓七山人昌彈琴兼送屈五還羅浮

韓生燕市來。夜向招提宿。本是悲歌擊筑人。援琴爲鼓清商曲。安絃操縵夜三更。良久徘徊不出聲。坐使閒心遠方聞。逸響生商風泠泠。七絃遍天馬。空山忽不見。石上爭流三峽泉。平沙亂落瀟湘鴈。聞道清商固最悲。不如清角更淒其。一彈試奏思歸引。再轉重愁雙燕離。此時晨鐘猶未撞。月露霜華滿深巷。四座無言歎息頻。篝燈欲滅風升降。羅浮道士思幡然。忽憶朱明舊洞天。種得梅花凡幾樹。泥成丹竈已千年。雲山告歸從此始。四百三十二峰裏。入海能馴海客鷗。攜琴便駕琴高鯉。

夜過曹侍郎溶倦圃二首

水泛鷗夷宅。沙沉構李亭。昏鐘藏古寺。修竹亂明星。轉信披衣慣。仍看上馬醒。山翁餘興在。舉手笑重經。初筵月已上。半醉榻頻移。罷奏飛龍引。長謠猛虎詞。時以虎齧城樂府見示朱絃清廟瑟。若木鄧林枝。正喜羊何在。明當共和之。時周子質李子兆潢適在郡

玄默攝提格

眞如寺塔重建

舊湧仁王塔。今開帝釋宮。蜂臺重攬勝。龍藏古稱雄。歷歷時堪紀。高高望未窮。地猶丞相宅。石是上軍功。戰火臨城日。飛塵浩劫中。魚羊乘乙酉。象馬失西東。匠訝胡寬巧。圖看郭恕工。宣和畫譜郭忠恕有雪山佛剎圖經營還

故蹟。髣髴像新豐。點墨遺千界。梯雲上半空。燈前招怖鴿。鳥下數歸鴻。不有危標建。安知寶境崇。火珠將月滿。金冶與天通。盤峻宜承露。幡吹定繞風。留題存片碣。高詠後羣公。白髮愁韋誕。炎廳靜祝融。伽藍如可記。應比洛陽同。

采蓴

湖水清無底。蓴絲滑可憐。相要三五客。采采莫迴船。坐恐葑田合。生憎荇帶牽。祇應櫻筍配。羶膩豈容前。

同作

周質

細蔓垂垂弱。輕舟箇箇添。參差方未已。采摘定無嫌。入饌銀絲滑。行廚翠釜黏。爲憐滋味別。更下水晶鹽。

又

朱彝鑒

四月湖流闊。三潭塔影低。最嫌絲滑膩。易脫掌東西。遠水旋教濯。歸舟亦可攜。家兄貯以瓦盆攜歸長水當筵嗤小陸。羊酪詎堪齊。

又

秀水鍾淵映廣漢

絲蓴先夏摘。何苦待秋風。入掌蠅蚊溜。緣流藻荇同。魚苗盛水滑。雉尾落盤空。一笑辭僧父。何勞蒜果筒。

湖上逢楊二給事雍建

零雨三年別。晨風萬里遙。川涂思往日。舟楫復今朝。碧草湖邊寺。青驄渡口橋。東山有絲竹。知爾定相邀。

同楊二給事飲徐給事惺舟中二首集唐

仙侶同舟晚更移。嬌歌急管雜青絲。相逢苦覺人情好。百罰深杯亦不辭。
風吹洲渚錦帆開。絲管啁啾空翠來。此曲祇應天上有。須成一醉習池迴。

夏日西湖同曹學士爾堪余山人懷汎舟待曹侍郎浴不至有感舊游愴然於懷作詩二首

翠壑南屏下。微風細草薰。山雷焚斷塔。沙柳拂晴雲。白舫朝朝度。清歌處處聞。芙蓉如可采。相約望夫君。
回首憐生事。驚心念物華。同攜今日酒。忽對去年花。驟雨翻青蓋。圓珠溜白沙。坐看雲色暝。餘溼到山家。

送曾司理王孫之官漢中

韓信臺前冷戰雲。漢王城北罷懸軍。三秦父老還相語。國士無雙屬使君。

西陵感舊

鄴下劉文學。陳留蔡議郎。後身那再託。同調轉堪傷。白首憐金谷。青山棄北邙。思歸應有夢。未許訴巫陽。

九日

九日烏程縣。天寒菊自花。遠山初過鴈。淺渚舊平沙。歎逝黃壚隔。登高白帽斜。重憐故鄉侶。載酒問誰家。

橈山橋觀漲

重陽連夜雨。初日汎層波。不上濠梁望。安知秋水多。淹留攀橘柚。想像駕龜鼉。北渚漫愁思。佳期奈別何。

題峴山窪樽亭

醉殺烏程酒。天寒不放船。從教騎馬去。日日峴山眠。

吳興客夜

東武亭邊樹。栖烏夜半啼。江清楓葉下。天闊鴈行齊。不寐仍杯酒。勞生此杖藜。誰家采蔕調。髣髴度前溪。

由碧浪湖汎舟至仁王寺飯旬公房

我愛仁王寺。來從碧浪湖。到門千樹合。登閣一峰孤。仙梵迷高下。香雲忽有無。坐愁風雨至。還與飯秋菰。

白雀寺

竹徑何年寺。松門百丈巖。野雲平石磴。江日冷楓杉。水落青蓮湧。花飛白雀銜。五湖看在望。生計有蒲帆。

對酒酬周貧兄弟

去作西陵別。來從下若還。慇懃杯酒在。試說道場山。

送曹侍郎備兵大同二首

司農論議朝端重。副相聲名輦下聞。豈意尙煩西顧策。翻教暫領朔方軍。河邊遠道人千里。天外鄉書雁幾羣。到日關城春色早。李陵臺畔柳紛紛。

關榆蕭瑟二庭空。烽火平安九塞通。往日連師驚朔漠。只今市馬互西東。黃河天上三城戍。畫角霜前萬

里風。知有馮唐論將帥。不令魏尚久雲中。

將之永嘉曹侍郎餞予江上。吳客韋二丈爲彈長亭之曲。並吹笛送行歌。以贈韋。卽送其出塞。

韋郎舊隸羽林籍。曾向營門教吹笛。不聽吳中白雪音。定呼鄴下黃鬚客。平原相見轉相親。置酒誇君坐上賓。下若尊壘朝未罄。東山絲竹夜還陳。閒來坐我花閒奏。玉洞飛泉嚮巖溜。古調多傳關馬詞。新聲似出康王授。問我東行到海壖。日斜江上慘離筵。還將北鴈南飛曲。催送錢塘楚客船。船人櫺鼓津頭泊。紅葉千山富春郭。忽作邊秋出塞聲。江楓岸柳紛紛落。哀絃促管不堪聽。賓御聞之亦涕零。挂席遠移嚴子瀨。看山直上謝公亭。聞君欲問雲中戍。雪消飲馬長城去。廣武營邊折柳時。黃瓜阜上題書處。司農舊是出羣才。此日征西幕府開。試向尊前歌一曲。梅花飛徧李陵臺。

舟行酬王明府世顯

君從漢陽來。飲我宜城酒。酒盡沙頭津。吏迎乘潮直。泝錢塘口。憶別西陵各惘然。東山零雨已三年。一朝遠作瀛壖吏。千里重浮夏口船。君家兄弟文章在。謂孝廉士乾夙昔聲名遍湖海。此去題詩孤嶼亭。白雲青草遙相待。我欲看山到永嘉。不辭蠟屐向天涯。謝公正有同舟興。相與揚帆采石華。

七里瀨經嚴子陵釣臺作

宋謝參軍翻有西臺痛哭記

七里嚴陵瀨。平生眺覽初。江山誰痛哭。天地此扶輿。竹暗翻朱鳥。灘清數白魚。扁舟如可就。吾亦釣臺居。

蘭溪道中懷遠

近郭開門一水居。別來消息近何如。銀絲細鱸蘭江鯉。不見佳人錦字書。

雙溪

小店雙溪口。官橋百尺長。登盤魚赤尾。入市棗青筐。菽乳成絲細。薑牙配鼓良。不知前路去。何處石爲羊。

金華道上夢遊天台歌

吾聞天台山。高一萬八千丈。石梁遠挂藤蘿上。飛流直下天際來。散作哀湍衆山響。燭龍銜日海風飄。猶是天雞夜半潮。積雨自懸華頂月。明霞長建赤城標。我向金華問客程。蘭谿谿水百尺清。金光瑤草不可拾。夢中忽遇皇初平。手攜綠玉杖。引我天台行。天台山深斷行路。亂石如羊紛可數。忽作哀猿四面啼。青林綠篠那相顧。我欲吹簫駕孔鸞。璿臺十二碧雲端。入林未愁苔徑滑。到面但覺松風寒。松門之西轉清曠。桂樹蒼蒼石壇上。雲鬢玉洞展雙扉。二女明妝儼相向。粲然啓玉齒。對客前致詞。昨朝東風來。吹我芳樹枝。山桃花紅亦已落。問君采藥來何遲。曲房置酒張高宴。芝草胡麻迭相勸。不記仙源路易迷。樽前只道長相見。覺來霜月滿城樓。恍忽天台自昔遊。仍憐獨客東南去。不似雙溪西北流。

黃龍寺

黃龍隘口黃龍寺。法鼓空林十里聞。故老尙談元總管。成功實倚耿將軍。蕭條象馬金輪地。寂寞山河鐵

券文古往今來意無限。仙壇瑤草幾斜曛。

蔣廣文薰留飲縉雲學舍爲談仙都之勝

軒后丹砂就乘龍。上紫清。不知滄海畔。亦有鼎湖名。故人家住梅溪上。渡口扁舟日來往。一別柴門已二年。看山忽作仙都長。要予松下飯胡麻。言自仙都道士家。時有仙童來海市。或看玉女載河車。一朝風雨青天注。馬迹龍輦不知處。蓮花一片天上來。從風飄落東陽去。東陽游女弄潺湲。素舸緣流濯足還。笑拾飛花看不足。當歌明月出雲間。廣文先生居四壁。青山無數堂階側。采藥曾迷阮客蹤。窪樽舊是陽冰宅。君去仙都訪道書。金龍玉簡定何如。他時儻入神仙窟。攜手同騎白鯉魚。

縉雲雜詩十首

吏隱山

隱吏昔山棲。留題有真跡。將尋好奇人。結茅看青壁。

窪樽石

不用青荷葉。何須白玉杯。窪樽山上石。醉客有千迴。

忘歸臺

連山積翠深。白石空林廣。落景不逢人。長歌自來往。

羅鷗灘

灘上羣鷗鳥。還應日日來。來時看野老。百過莫相猜。

天際樓

蔣廣文蕭
讀書處

高樓上浮雲。故人曾此住。何處問歸舟。惟見雲中樹。

西巖

朝聞谷口猿。暝宿崖上月。夜久天風吹。西巖桂花發。

惡谿

惡谿無行舟。高下惟亂石。谿中玳瑁魚。可以薦嘉客。

仙巖寺

咫尺仙巖寺。雲峰望轉親。夕陽鐘磬發。猶有未歸人。

積翠亭

孤亭雲木暝。衆壑哀猿嘯。空翠濕衣裳。夕陽忽來照。

桂山

蒼蒼桂之樹。樹下幽人語。山中正可留。惆悵王孫去。

繇丹楓驛曉行大雪度青雲嶺桃花隘諸山暮投麗水舟中三首

曉發丹楓驛。微茫出遠郊。月斜吹積雪。風急燒黃茅。斷嶺羊腸折。寒沙虎跡交。軍麾猶未靖。何處得安巢。
隘口屯師日。功臣汗馬勞。耿再成破石末宜孫於此空山無赤幟。廢壘但黃蒿。亂插繇花盡。千盤細路高。繇來設險地。未必盡神臯。

峻嶺行還出。愁人跡轉孤。飢寒催暮日。風雪逼窮途。土鏗須同燎。金刀可剩沾。莫辭舟楫小。今夜宿江湖。

石門懷古寄諸大九鼎

石門山中瀑布水。奔流直下青雲裏。晴日遙看細雨飄。中林近見微風起。謝公當日此山棲。晞髮陽阿路不迷。已遣連巖移密竹。還營高館對迴谿。昔賢勝跡今游眺。佳處猶能領其要。我亦沉冥山水人。振衣便可稱同調。芳塵瑤席已無存。惟見岿巍雙石門。不攜江海同車客。何處相期知者論。

謁劉文成公祠

草昧經綸日。英雄戰鬪年。真人淮泗起。王氣斗牛躔。命世生良弼。卑棲役大賢。一官齊簿尉。千里正戈鋌。記室依袁紹。飛書謝魯連。神鷹思飽掣。威鳳必高鶩。漢祖除秦法。周王卜渭畋。廟堂才不易。東帛禮宜先。遂有君臣契。能令帷幄專。南征頻克敵。北伐旋摧堅。王會收三統。軍謀出萬全。河山分帶礪。冠蓋儼神仙。未辟留侯穀。長辭范蠡船。麒麟當日畫。竹帛後時編。一自丘陵改。重愁歲月遷。隆中猶故宅。繇上少封田。

舊俗還祠廟。清歌入管絃。黃金遺像蝕。鐵券幾人傳。古瓦甍毳落。荒庭檜柏圓。蛛絲虛寢罨。鳥跡斷碑眠。想像陰符策。沉吟寶劍篇。前賢餘事業。後死尙迍邐。去去辭粉梓。栖栖到海壖。空林多雨雪。哀角滿山川。玉帳無遺術。蒼生久倒懸。憑留一黃石。相待穀城邊。

永嘉對月懷家孝廉一是四首

娟娟東城月。濯濯中園露。修堞乍升輝。廣穉已流素。感物成憂端。翹思念情故。心賞竟莫同。獻歌有遐慕。昔我濟江時。別子澄湖陰。申以款曲言。謂可超重深。軒車來何晚。離緒故難任。不因道路修。惠以瑤華音。瑤華尙阻修。何以展嘉覲。甌越非殊鄉。方舟翼來適。新蒲紛紫茸。春草齊碧色。徒令芳醕陳。庶幾煩慮釋。芳醕無長筵。煩慮何由捐。我思一何篤。有若明膏煎。兼山義有託。涉川通未愆。安得飛鴻翼。報子池上篇。

永嘉除日述懷

不作牽裾別。飄然到海隅。謀生真鹵莽。中歲益艱虞。鄉里輕孫楚。衣冠厭魯儒。微名翻詆挫。暇日少歡愉。處賤無奇策。因人遠禍樞。同舟邀楚客。王明府世顯聽曲賞巴歛。岸轉羣峰出。潮迴衆壑趨。江聲漁浦靜。樹色釣臺殊。祠宇浮空翠。松林儼畫圖。羈懷方浩蕩。前路已崎嶇。草宿侵寒兔。林栖逐夜烏。微茫辭建德。縹緲望仙都。水訝溪流惡。山將棧道紆。僕夫行木末。風雪灑天衢。老鶴侵晨語。窮猿入暮呼。轉思臨嶼屺。誰分久泥塗。柔櫓輕帆下。青田麗水區。哀禽爭叫嘯。孤嶼忽須臾。洵美東甌地。由來謝客娛。詩篇留汗漫。旅食

慰飢劬。強禁樽中酒。難憑肘後符。朋簪方克萃。禮法未應拘。生意窺籠鳥。流年過隙駒。笑看風土別。驚見物華徂。紅綻官梅萼。青分櫪馬芻。深杯期夜酌。細菜出春廚。坐久親孤燭。更深判百觚。遠書勞日夜。歸夢越江湖。正憶高堂在。知攜兩弟俱。屢空無長物。相視必長吁。菽水承顏好。辛盤令節須。艱難存病婦。燈火索鄰逋。書籍愁捻賣。衣裳定有無。女長工翦綵。男大學投壺。倚著憂他日。沉吟媿壯夫。虞翻仍去越。張翰未歸吳。詎有追風驥。恆隨汎渚鳧。達生兼止託。齊物任榮枯。述作安時論。鶯花盡友于。莫將鄉國淚。頻灑阮公途。

大牆上蒿行

高秋何多悲。風草木黃落。盡依于土壤。我悲夫轉蓬。從風高下。亦復南北西東。人生在六合間。渺若蜉蝣之羽。促迫日暮。寧保厥躬。何不恣君中心所欲。右挾矢。左抨弓。追脫兔。落輕鴻。躡熊蹯。炙鹿茸。開我中堂。坐我友朋。援琴倚瑟。鼓鼓考鐘。胡爲自苦。乃爾十囊五囊之錢。千倉萬箱之粟。細而鹽豉。蒜果量籌。握算戚戚思慮。終成老翁。上有蒼蒼者。天下有薄薄之地。日往月來。寒往暑來。人生安得久。長視不如坐。堅車張高蓋。貴且快意。乘我廐馬。出入翱翔。黃金爲絡。青絲爲韁。魯之乘駟。周之訾黃。燕之馱駘。唐成驢驘。雖自謂神且駿。曾不如臣馬良。呼韓娥。進趙倡。歌陽阿。引清商。暢飛暢舞。二八成行。輕軀宛轉。長袖低昂。自迎心蕩。躡屣鳴璫。晉之南威。楚之陽文。吳之夷光。稱名前代。亦自謂美而豔。夫何可方。歲月疾如馳。爲歡

能幾時。升沉分定。窮達天爲。獲我所求。亦復何思。古來達者。飲不辭豐。刑酒誥。徒箴規。劉伶畢卓。真吾師。但當一月二十九日醉。忍使一年三百五日成齊期。

襄陽曲

襄陽近大隄。君當慎行旅。笑客襄陽兒。憐錢大隄女。

曝書亭集卷第六

古今詩五

昭陽單闕

永嘉元日

官舍紅梅放。繁花一樹春。誰憐元日會。無復故鄉人。

元夕寄故鄉諸子

戍鼓動高城。青燈暖虛壁。爲報故園人。天涯此元夕。

山雪

山雪消猶未。江梅凍已殘。龍蛇翻遠壑。鳥雀凜相看。短服裝緜少。深杯入手乾。今宵聞擊柝。轉憶北城寒。

夢中送祁六出關

酌酒一杯歌一篇。沙頭落葉何紛然。朔方此去幾時返。南浦送君真可憐。遼海月明霜滿野。陰山風動草連天。紅顏白髮雙愁汝。欲寄音書何處傳。

憶河豚二首

古今詩 五

九五

正月河豚美。嘗時下箸貪。未應居海曲。翻遣憶江南。野老匙真滑。西施乳更甘。還持春酒榼。爛醉與朋簪。下若槎頭鱸。松江巨口鱸。嘉魚吾所欲。美味爾終輸。一食輕生慣。頻年入饌無。故鄉弛海禁。應得飽春廚。賦得歸鴈寄曹使君雲中

萬里南來鴈。歸飛又一羣。三江重汎汎。二月正紛紛。顧影愁官燭。懷書望浦雲。關門他夜月。應得故人聞。舍弟彝鑾遠訪東甌喜而作詩

急難逢令弟。訪我自江東。頓喜羈愁豁。兼聞道里通。晴江空翠裏。春草亂山中。知汝南來日。西陵定遇風。題朱十江東見弟詩後

錢唐諸九鼎駿男

有客傳朱十。江東見弟詩。長城四十字。孰敢近偏師。

永嘉雜詩二十首

松臺山

蒼蒼山上松。颯颯松根雨。松子落空山。朝來不知處。

斜川

九曲斜川水。分流到海濱。金釵河上月。留照浣紗人。

青牛塢

我行白鹿城。曉入青牛塢。長嘯不逢人。松門已亭午。

春草池

謝公去已久。空餘池上樓。春風園柳色。朝夕使人愁。

太玉洞

亭亭五粒松。華蓋神君宅。風吹寸草生。依然綠袍色。

東山

判向花前醉。何難典緼袍。江南春可樂。策馬自蘭皋。

南亭

薄雲雨初霽。返照南亭夕。如逢秋水生。我亦西歸客。

西射堂

已見官梅落。還聞谷鳥啼。愁人芳草色。綠徧射堂西。

北亭

日落空水深。潮迴春岸白。時有看山人。江南望江北。

孤嶼

孤嶼題詩處。中川激亂流。相看風色暮。未可纜輕舟。

謝客巖

朝看白雲飛。暮看白雲宿。聞有山阿人。曾歌白雲曲。

花柳塘

山雪初消盡。春塘亂水喧。州人還幾日。相見樂游原。

吹臺

仙人留吹臺。近在南山麓。上有半死桐。下有孤生竹。

吳橋港

聞說吳橋港。荷花百里開。當年王內史。五月權船迴。

白水滌

雲峰斷人行。活活風泉落。知有山桃花。青春發紅萼。

斤竹澗

谷口啼清猿。巖花泣深露。美人兮不來。風篁自朝暮。

瞿谿

鳥驚山月落。樹靜谿風緩。法鼓響空林。已有山僧飯。

華嚴山

聞昔華嚴寺。頻經逸少過。洮河流石研。未若此中多。

上戊渡

月露下檣烏。天風靜江樹。何處夜歸人。歷歷沙中語。

綠嶂山

谿山百里陰。霜葉鳴瑟瑟。試鼓丘中琴。定有幽人出。

雨

城晚吹煙霧。風迴渡水雲。入林初漠漠。潤礎旋紛紛。響愛青荷葉。涼思白練裙。西堂有官燭。更遣夜深聞。

七夕

遠客清樽夕。虛堂玉露秋。關山頻北望。河漢已西流。葉落他鄉樹。砧催故國樓。今宵看織女。未必詣牽牛。

東甌王廟

九牧維揚外。三江霸越餘。王勾踐之後。同長沙王吳芮。率百越師。從漢祖入關滅楚。入關從漢約。遵海裂秦墟。豪俊宜如此。艱難氣不除。策功巨項藉。分壤接無諸。迹異尊黃屋。忠能奉簡書。長沙堪伯仲。百濮定何如。萬古開王會。孤城指帝

車。永嘉城象北靈旂存髣髴。過客盡欷歔。殿瓦年頽坼。霜林日漸疎。躑踞山鬼立。苔蘚石堂虛。側想風雲會。乘時草昧初。遠塗今日暮。下拜獨躊躇。

華陽精舍贈源上人

支公櫪上馬。謝客郡東山。繫馬林亭外。看山日暮還。瑤華猶未折。桂樹尙堪攀。試醉陶潛酒。狂歌白石間。

郡東山對月有懷周四吉亥陳大佑吳二周璲

白露侵亭幔。涼煙滿桂叢。如何秋色裏。不與故人同。蕭颯聞風葉。飛揚見羽蟲。南樓滅明燭。佇望海雲東。

秋日對酒江心寺同高石埭駿升作二首

謝監尋山日。江童擊汰迎。寒潮天外落。秋草渡頭生。歷覽窮孤嶼。逍遙倚化城。行廚深樹裏。乳酒正須傾。驟雨連山暗。回風病葉飛。入林初緩帶。改席忽沾衣。客醉從高枕。川長得斷磯。扁舟憐范蠡。鰕菜久忘歸。

雨

斷續江天雨。涼風滿戶庭。轉添秋草綠。更洗暮山青。積霧猶沉樹。明河早見星。南亭有歸客。朝夕待揚舲。

夜渡永嘉江入黃巖

絕岸蒼茫水。窮山斷續風。雨歸沉黑蜨。川暝失丹楓。華髮垂垂短。悲歌處處同。最憐中澤裏。深夜有哀鴻。

送吳二先輩還漢陽

漢南歸思遠晴川。溢浦西風送客船。莫上武昌門外望。斷腸楊柳似當年。

九月十四日夜月

坐惜如珪月。懷人歷九秋。關山仍遠道。西北有高樓。苦憶前溪別。應添少婦愁。清輝憐玉臂。獨自下簾鉤。

返照

返照開寒峽。江城入翠微。明霞飛不落。獨鳥去還歸。是處聞吹角。高樓尙曝衣。山家多畏虎。應各掩柴扉。

孤嶼亭對月

皎月空江滿。寒雲萬里收。纖毫瞻顧免。恍忽動潛蚪。望遠高樓笛。行歌半夜舟。南征有鴻鴈。相傍宿沙頭。

雨渡永嘉江夜入柁溪

落日下崦嵫。飛雨自崇墉。駕言出北郭。汎舟橫東江。近岫旣凌緬。遙岑亦濛籠。葱青水竹交。乃有樵逕通。潛蚪寒載蟄。海鷗夕來雙。顧望雲葉開。張星昏已中。荒岡響哀狖。枉渚遵輕鴻。故鄉日以遠。川路靡克終。寄言薜蘿客。歲宴期來同。

題廊下村主人壁

江城獨客一千里。海月愁人十上絃。夢裏還家無長物。天涯歸思逼殘年。飢寒僮僕今何有。雨雪關山劇可憐。珍重主人投轄飲。幾回把酒意茫然。

華壇望鴈宕山歌贈方十三朱生朱十八振嘉

我昔逢羽人。迢迢歷滄海。貽我神山鴈宕圖。玉笈金箱至今在。夢想忘歸亭上游。琪花瑤草幾春秋。崩流一萬丈。濯足大龍湫。邇來作客荒山道。欲往層崖事幽討。方君遇我顏色親。朱子更覺人情好。攬環結珮山澤間。樂酒今夕須歡顏。登華壇之絕頂。眺鴈宕之迴巒。雲容容兮欲雨。水嘈嘈兮下山。遙岑出沒不可以悉數。但見哀禽離獸日暝而俱還。君不見宗少文當年意興真軼羣。名山臥遊不得見。眼前圖畫空紛紛。君不見謝康樂。跡近名山遠城郭。咫尺丹梯竟未登。江南江北徒丘壑。我今得偕二子從遙看。一百二高峰。彈琴坐待天邊月。攜手同行石上松。荆榛極天路參錯。惆悵平生遠游諾。安得仙人相贈九節筇。招爾雲中兩黃鶴。

病橘

病橘何年植。巡簷許數過。他鄉淹歲月。此樹漸婆娑。滿院飛蟲繞。空庭落日多。向來懷袖意。華實竟蹉跎。

西陵後感舊

潘安曾對酒。吳質數論文。舊史悲難續。斯人意不羣。一爲江海別。遽作死生分。淒斷山陽笛。那堪歲歲聞。

文丞相祠

尙憶文丞相。當年此誓師。計成猶轉戰。事去祇題詩。竹柏空祠屋。牲牢尙歲時。鳴夸他日恨。異代有同悲。

謂永嘉諸生
鄒維則也。

歸次皋亭山作

去年雨雪桃花嶺。此日煙波橋李船。相值皋亭山上月。離家一十二迴圓。滄江游子愁心劇。白髮高堂望眼穿。行李自憐垂橐返。田園生計轉茫然。

闕逢執徐

別李繩遠

鴻鴈歲北向。鷓鴣日南征。棄置父母邦。各事萬里行。我游踰上谷。君去適昆明。迢迢異鄉縣。邈若參辰星。登艫卽長道。祖席依修桐。俯視溝水流。仰見浮雲平。居人有餘戚。況乃衢路情。昔賢重離別。努力期修名。忠信苟不渝。川陸猶戶庭。日邁月斯邁。暑往寒再更。但令長相思。何慮不合并。

送孫處士默還黃山

蕪城客散亂烏啼。別業黃山路不迷。後夜相思秋色遠。月明三十二峰西。

淮陰城下作

岸柳行將徧。郊扉日漸昏。淮陰十萬戶。誰解飯王孫。

七夕雨

七夕他鄉雨。孤舟下相城。戍樓連樹黑。漁火隔河明。且展輕衾臥。難沾濁酒傾。故園兒女在。相憶定含情。

黃河夜月

落月黃河曲。先秋白露寒。牽牛何皎皎。桂樹此團團。直北程難計。天南淚不乾。居人掩閨夕。知己夢長安。

謁先賢仲子祠

光岳鍾青帝。明禋配素王。世家猶不泯。俎豆儼成行。力養嗟何及。長貧更可傷。如聞琴瑟在。千載感升堂。

分水廟酬高大佑鉅

落月西風動戍樓。津亭官柳繫輕舟。行人莫唱思歸調。汶水南來已北流。

守廂清源驛凡五日不得度

清源驛路接幽燕。日日沙頭但繫船。五兩南風空自好。無由吹送衛河邊。

臨清州大寧寺

西北浮雲過雨晴。香臺落日散高城。遠煙歸鳥忽雙下。法鼓空林時一鳴。江海幾人懸夢寐。詩書無地問柴荆。勞生擾擾成何事。目極關山萬里情。

曉發東光縣

際曉投前路。衝寒祇縕袍。關河仍鼓角。舟楫已風濤。落月金樞動。疎煙土鏗高。謀生宜有策。筋力爾徒勞。

青縣同高大佑餽雨泊

黃河秋潦急。羣盜正紛紛。去遠驚秋半。愁多語夜分。空城寒更雨。哀角斷還聞。正值南飛雲。嗷嗷度海雲。

董子祠

漢日江都相。荒祠舊水濱。玉杯存俎豆。青簡重天人。夕鳥窺園下。秋花裊露新。淒涼不遇賦。千載一沾巾。

八月十五夜集天津曹武備斌官舍分韻得牀字

北里商歌倚笛牀。層城秋色轉蒼涼。關河西望猶千里。時余將適雲中烏鵲南飛更幾行。冷露自零叢桂樹。深杯

無那鬱金香。習池不改山翁興。倒載還同舊葛疆。

高博士恆懋席上留贈公子緝睿二首

列席先投轄。升堂喜盍簪。飄零忘薊北。風物盡江南。滄酒盞罌滿。張梨白露甘。留連如意舞。更與阿戎談。西陸清秋候。東山舊宅開。壺觴兼日夕。文詠許追陪。且爲看花起。還愁上馬回。春風倚歸櫂。賭墅定重來。

出居庸關

居庸關上子規啼。飲馬流泉落日低。雨雪自飛千嶂外。榆林祇隔數峰西。

土木堡

平蕪一簣狼山下。九月驅車白霧昏。到眼關河成故迹。傷心土木但空屯。元戎苦戰翻迴蹕。諸將論功首

奪門早遣金繒和社稷。祠官誰奉裕陵園。

宣府鎮

高城西北控燕都。吹角清秋落日孤。尙憶武皇巡玉塞。親從鎮國剖金符。宮槐御柳今蕭瑟。虎圈鷹坊舊有無。邊事百年虛想像。誰誇天險塞飛狐。

上谷道中

急雪千山下。渾河萬里流。搖鞭逢漢使。走馬入雲州。

苦寒行

九州皆可歷。何爲雲中居。聽我歌苦寒。泣下沾衣裾。解一寒風利如刀。雪花大如席。重裘如束水。安問絺與綌。解二白日無光晶。驚沙但茫茫。舍我四方事。土室獨摧藏。解三白登自言高。乃是太古雪。漚洩自言深。腹堅不可裂。解四斧冰持作糜。舖糜糜已冰。展轉長宵中。晨夙不得興。解五攬衣未及帶。手龜血出漉。嚴霜割我面。哽咽不得哭。解六男兒可憐蟲。出門思故鄉。寧飲吳市酒。不樂邯鄲倡。解七

傷歌行

北風其涼。雨雪如擣。栖栖素冠。行彼周道。解一蟹則有筐。蟬則有綏。父喪不葬。誰憐我爲。解二瞻彼桓山。有革其羽。載鳴載揚。忽失其侶。解三力行雖疾。不如奮飛。遠望雖高。不如早歸。解四凡百君子。庶幾心惻。翳桑之餓。

可以報德。五

十月十四日夜同曹使君雲州對月

發軌自徂暑。息鞅及玄冥。迢迢沙際月。皎皎雲中明。皋禽警朔吹。別葉辭苦莖。青霜降北陸。參井緬縱橫。主人託嘉藻。休澣寡所營。悟彼行役艱。曲宴奏中誠。清樽湛瑤席。兔首亦以烹。但言音塵闕。豈意良覲并。謙謙君子柄。習坎美不盈。澄輝矢相照。慰我殷憂情。

十五日夜月

重陰積邊亭。風候異揚粵。駢筵集親懿。復此亭上月。析析靜衰林。斐斐滿層闕。清砧無緩響。素雲屢興沒。客情易爲懷。庶用慰寂蔑。哀鴈逝不居。流芳久云歇。天道互虧盈。物理信昭昧。詩人戒太康。職思永無忽。霜露日夜零。故鄉渺難越。悽愴游子心。獨坐待明發。

十六日夜席上贈陳孝廉容永孝廉成邊

晷運方代序。感此成鬱陶。良友紜白駒。芳酒永今宵。團圞東城月。萬象仍光昭。誰言容輝減。彌覺神理超。哀笛奮層樓。餘響薄風霄。悲哉遠征士。氣輜不得驕。沖魄會有宜。盛滿誰能要。伯陽之流沙。箕子去商郊。苟懷艱貞節。道德豈不劬。申章託微諷。撫景答長謠。

十七夜月

磊磊列宿明。碗碗塞日晚。盍簪數晨夕。吾道豈云遠。飛光上層軒。薄雲冒崇巘。迢迢界斜漢。惻惻引朔管。圓靈乍警闕。素魄已辭滿。清輝寧有渝。潛德期日損。幽人貞素履。君子利往蹇。擇術雖殊塗。心賞得所款。感目旣多顏。懷鄉匪異撰。申旦陳苦言。庶令勞者纂。

甲辰冬月朱十訪我塞上賦對月詩奉答三首

司理曹溶潔躬

昔我登羅浮。靈雲翼飛軒。炎光扇四序。曄曄神芝顏。有美儼相從。盛作游覽言。芳蘭麗重墀。列植皆翩翻。洗爵命清醕。鱸鯉出丹淵。選日駕輕楫。跌蕩珠江前。矢口吐嘉藻。衆賓稱我賢。聿來鴈門棲。轉瞬八九年。寒燠旣殊軌。苦志何由宣。燦燦金張徒。凌忽若浮煙。賴有同心士。風雨仍勿愆。樂莫故交樂。遂賦明月篇。月出照城闔。兵甲何洋洋。連山萬餘里。繇亘不可詳。列營慘清角。羽霧隨風翔。束芻徵近郊。飛駁蔚千行。獵火耀繁星。毳服禦嚴霜。章甫謬司憲。飭躬戒無荒。蓬菅閉重關。民俗偕吉康。方廛索處憂。之子凌大江。弗效兒女仁。忱慨溢中腸。曠觀幽與并。回睇思故鄉。旦夕事游燕。孤抱成匹雙。何意塵土區。逍遙奉圭璋。圭璋慎中闕。黽勉循昔經。暫當展清輝。釋憤於邊庭。深雪蔽層阪。修柏含青英。匡世羨高度。緇塵詎能撓。短褐濟三冬。園葵待晨烹。曲房翦茅茨。靜見游鴻征。文籍繞四座。持酒忻共傾。開懷玩流景。哀樂全其貞。悠悠道路間。乃得親友生。恆嶽有磐石。足以喻精誠。環顧王化周。冀方息交兵。卷組及良時。無爲耽令名。

去歲山川縉雲嶺。今年雨雪白登臺。可憐日至長爲客。何意天涯數舉杯。城晚角聲通鴈塞。關寒馬色上龍堆。故園望斷江村裏。愁說梅花細細開。

雲中客舍曹武備自津門以筐蟹銀魚見寄賦謝二首

千里三沽使。傾筐異味傳。霜螯初入手。臘月更須憐。重馬愁關吏。香杭憶野田。江鄉好風物。罷酒數歸年。水族殊鄉至。明燈夜不孤。雪花寒意減。玉盃近看無。反厭流匙滑。宜將剩酒沽。遙憐垂釣客。白首向江湖。

贈周參政

周君北地推風雅。幾載栖遲白門下。四壁蕭然竟罷官。知君亦有悠悠者。匹馬西來訪故人。相逢師友更情親。自言溽暑辭堂邑。不覺辛盤換早春。春晴風日官齋迴。翰墨于今數公等。畫品真同顧愷工。隸書遠見鍾繇並。貽我梅邊索句圖。江南春思到平蕪。蒼苔濁酒尋常得。冷蕊疎枝何處無。紇干山高凍飛雀。健步移來總蕭索。不見黃須細細開。惟愁白雪紛紛落。蘇武城邊送別遲。桑乾河上已流澌。遙將南浦離人曲。迸入西征橫笛詞。憐君此去壺關道。盍簪到處逢迎好。澤潞三時芳樹多。江風五月歸帆早。滄洲萬里憶田廬。流水柴門今尙虛。卜鄰儻就移家約。來共梅花溪上居。

絕塞

絕塞衝寒起。妖星逼歲除。幾時離畢昴。三見改蟾蜍。我友官中禁。憂時獨上書。謂楊給事雍建時上疏言彗星見宜修葺由來

天道遠。垂象果何如。

旃蒙大荒落

長歌行

糾糾葛屨。行彼中逵。豈無轅馬。登高則危。解一姬姜誨淫。吉士悼之。赫赫王侯。竊鈎笑之。解二羔羊之革。可以禦冬。狐貉雖溫。君子固窮。解三誰謂松柏。微霜萎而誰謂風雨。雞鳴已而。解四芻蕘者謀。先民所度。志士立言。豈必好爵。解五陟彼北山。俯視崇丘。千秋萬歲。孰知我憂。解六

短歌行

飲酒當醉。拔劍當歌。人生相知。樂豈在多。解一相彼中林。枝葉猗儺。嚴霜一至。焜黃奈何。解二飄飄寒風。不知所屆。豈曰無衣。將子于邁。解三鳴鹿在囿。載食其蒿。男兒墮地。惜無錢刀。解四明星在天。雨雪在野。我思故人。泣數行下。解五今夕不飲。來日大難。今者不樂。來朝永歎。解六

和朱十短歌行

嘉興鄭珥隨始

北風烈烈。雨雪載塗。我思禦冬。旨蓄則無。解一濯濯江湖。曷取其魚。緜緜遠道。曷策其車。解二僕夫夙駕。攬子之祛。子無先路。俟我城隅。解三尊有甘酒。不在百觚。俎有嘉肴。不在兩輸。解四子有苑囿。當推我居。我有錢刀。當念子需。解五蟬螿迫暮。傳語螻蛄。今者不樂。斯焉已夫。解六

鴈門關

南登鴈門道，騁望勾注巔。山岡鬱參錯，石棧紛鈎連。度嶺風漸微，入關寒未捐。層冰如玉龍，萬丈來蜿蜒。飛光一相射，我馬忽不前。抗迹懷古人，千載誠多賢。邗都守長城，烽火靜居延。劉琨發廣莫，吟嘯扶風篇。偉哉廣與牧，勇略天下傳。時來英雄奮，事去陵谷遷。數子不可期，勞歌爲誰宣。嗷嗷中澤鴻，聆我慷慨言。

觀獵

白狼堆近雪嵯峨，風卷黃雲入塞多。盡道打圍春更好，夕陽飛騎兔毛河。

晚次崞縣

百戰樓煩地，三春尙朔風。雪飛寒食後，城閉夕陽中。行役身將老，艱難歲不同。流移嗟鴈戶，生計各西東。

滹沱河

滹沱河上流，湍急騎馬春。冰滑可憐，百尺浮橋空斷板。孤城哀角動荒煙，愁顏送老飢寒日。絕塞因人雨雪邊，轉憶江鄉多樂事。花濃齊放五湖船。

將次山陰墮馬傷足張明府施大柱顧逆旅餉酒賦謝二首

可怪乘船客，今朝墮馬來。半人宣武笑，長路步兵哀。地主逢傾蓋，天涯獨愛才。淹留憐逆旅，相餉竹根杯。果見軒車至，倉皇啓夕扉。亦知寬禮數，強起著裳衣。涕淚餘生在，泥塗萬事非。遐方堅臥轍，猶得藉光輝。

留贈王沙縣泰墳四首文端公家屏孫

黃閣先朝重清門絕塞存東山遺別墅丙舍有諸孫吳楚游能徧詩書道自尊憑將飛蓋夕聯騎問詞源
隨馬愁方劇欣逢出戶迎人扶妨折足家遠竟全生翦韭當三月浮杯及二更熟知舟楫趣款款話南征
先臣典禮日相國去官初各建留侯策同傳賈傅書文端公以爭建儲去國至先文恪掌大宗伯事章凡三十上得允聽歌增忼愴話舊
各歎歎俯仰悲身世相看計盡疎

范甌萊蕪返王鳧葉縣歸飢寒仍不免子姓復何依挂壁蠲租詔張羅款客屏由來被褐士萬慮與時違

將之晉陽留別包十二銘

客程冰雪阻蕭關薰草芳時各未還此去尙同千里月相思知隔幾重山

七馬坊

積潦黃蒿外連岡黑霧中轉愁人馬滑真覺道塗窮陶穴遺深井沙陀沒故宮離程渺天末九月斷征鴻

再度鴈門關時聞舍弟彝鑿病卒

鴈門關北鴈初飛萬里征人淚溼衣回首秋風行已斷天南消息到應稀

夢寐

夢寐看兒女沉吟泣數行他時嘗獨立永日見相將去動憐渠小歸應共我長雲山千萬里誰道不思鄉

捕虎詞

黃桑彎弧棘作弩。村民少長齊捕虎。南山有鹿北有獐。何爲馱我檻下羊。青天杲杲日出橫。行大道終
羅殃。君不見靈丘捕虎虎盡死。太原城中狼入市。

晉祠唐太宗碑亭題壁集杜

步履深林晚。春池賞不稀。文章千古事。社稷一戎衣。野日荒荒白。悲風稍稍飛。無由覩雄略。寥落壯心違。

宋烈女行

紅羅持作帕。素練持作巾。何必合衾幃。始爲同心人。宋氏有女典。生長蔚州之野。西崖之山。年紀十五餘。
許配千字村。村民蘭州廝。大義結夫婦。忽登泰山籙。人壽不得久。女方曬穀。聞之聲悲哀。長跪告父母。兒
當從黃泉下。信誓旦旦不可乖。父母向女言。尊章爾未事。慎勿捐形軀。相保親父子。各各還室中。涕淚終
不止。月正三十日。其日二十三。白日從東來。奄忽墮西南。闔門夜無人。女向空庭坐。攬我素練巾。接彼紅
羅帕。徘徊寢室旁。自挂中門下。父母啓視。哽咽不得言。觀者四方至。歎息日暮還。童童暗樓側。乃有松柏
林。誰言寸草荳。乃有松柏心。

明妃曲

上林消息斷歸鴻。記抱琵琶出漢宮。紅頰近來憔悴盡。春風更遜畫圖中。

柔兆敦牂

臺駘廟

鳳鳥書官後。鴻荒障澤年。神功開白壤。帝系出金天。分野捫參次。山川奠禹先。按圖移岸谷。紀遠昧星躔。亂水汾洮別。諸姬沈妣聯。唐風誰始祀。魯史至今傳。簫鼓橫流散。風沙急溜穿。勢曾吞北漢。潤亦被西邊。璧馬黃河並。雲旗玉井旋。軒裳存想像。憑弔一茫然。

送趙三滿還永年

離堂卜夜且成歡。酒盡休歌行路難。四十逢時猶未晚。看君騎馬入長安。

太原客舍同方三孝廉會盛話舊二首

遠戍崔亭伯。還家管幼安。千金裘馬盡。十載道塗寒。華髮同雙鬢。悲歌感萬端。平生蕭瑟意。長缺爲誰彈。舊業東山下。曾經賭墅過。飄搖秋雨後。零落戰場多。避地從人問。誅茅奈老何。烏衣雙燕子。留恨滿關河。

龔百朋自梗陽以詩見寄漫答二首

傳聞花縣客。不異幔亭居。閩中張君汝瑚令清源龔子館焉旅興吟紅藥。賓筵鱸白魚。仲宣懷土日。司馬倦游初。咫尺橫

汾隔。難尋下澤車。

道重論交地。書題把臂前。相憐煩縞紵。永好有詩篇。多難休儒服。他鄉澀酒錢。但期陽羨隱。見日話歸田。

七夕立秋王方伯顯祚席上和毛會建

暑退林初暝。尊開露漸滋。客中憐夜集。天上果秋期。片葉辭風下。長河卷幔垂。莫教涼月盡。同和謝莊詩。

客夜

陽曲城頭烏夜啼。明燈深巷綠牕低。從教趙女工瑤瑟。不遣愁人醉似泥。

聞黃鶴樓成賦寄楚中一二知己

平生未鼓湘江柁。萬里投詩黃鶴樓。壯觀百年今在眼。異時獨上迴含愁。碧牕下湧樊山月。紅葉斜連鄂渚秋。爲報故人多釀酒。飛帆眞作漢南遊。

寄酬譚七舍人兄吉璽陸二舍人弟藻

客久憐書札。鄉遙感歲時。空淹雞鹿塞。遠隔鳳凰池。九月茱萸會。頻年雨雪詩。朝回逢陸弟。爲報日相思。

題錢宗伯謙益文集後集杜

海內文章伯。周南太史公。衣裳判白露。門巷落青楓。興與煙霞會。人今出處同。白頭無籍在。愁坐正書空。

題倦圃圖二十首

叢筠徑

柴門面湖水。深徑聞人語。月出翠煙開。相送乘舟去。

積翠池

流水石橋東。修篁蔽空曲。獨吟橋上行。縹緲衣帶綠。

浮嵐

宿鷺拳沙石。虛牕啓夕煙。東西望南北。蓮葉總田田。

范湖草堂

松石閉門中。芳菲蕙草叢。春船迴夜月。鰕菜幾時同。

靜春菴

晴戶罨晴絲。風花爛紅藥。緬懷風中琴。兼此花下酌。

圓谷

山牆高下築。中見林扉開。相邀入空谷。偶坐心悠哉。

芳樹亭

獨石敲長臥。空亭夜不扃。春風平仲色。相見幾回青。

谿山真意軒

遠樹聞疎鐘。夕陽上喬木。相對忽忘言。賞心在幽獨。

容與橋

清淺水石間。文魚散花嶼。催客引流觴。山橋更延佇。

漱研泉

主人南粵歸。獨載端溪石。晝日三摩娑。此意人不識。

潛山

積雪開半林。洩雲有膚寸。會此靜者心。潛藏本無悶。

錦淙洞

霜林吹石溜。清響徧亭皋。夜半愁風雨。不知山月高。

采山樓

高樓坐銷憂。橋李亭西路。夕照望千家。春浮倚雙樹。

狷谿

我本狂歌子。卻愛狷谿水。滔滔天下人。誰能洗其耳。

金陀別館

舊識談經地。巖扉靜不開。秋深叢桂發。金粟禮如來。

聽雨齋

風吹石蘭花。柔荑雨中長。清夢入空山。亂落紅泉響。

橘田

瀟灑衡門下。陽坡縱所如。青霜猶未降。先報右軍書。

留眞館

平生金石心。一室千秋慮。我亦問奇來。徘徊不能去。

澄懷閣

欲覽城南勝。宜登池上樓。煙波長在望。不放五湖舟。

春水宅

遠水浮橋直。方塘入戶低。東風楊柳樹。吹綠草堂西。

